



## ENERGETSKA EFIKASNOST

Šest toplijih i  
ljepših  
zgrada  
u Centru



## VODOVOD NAHOREVO

Nema više  
buradi i  
kanistera



## NOVA CESTA

Ulica Maria  
Mikulića više  
nije slijepi  
krak



# CENTAR

INFORMATIVNI BILTEN OPĆINE CENTAR



# Nema više buradi i kanistera



U prisustvu mnogobrojnih mještana te predstavnika Općine Centar i Kantona Sarajevo 8. februara 2018. godine, na lokalitetu rezervoara Nahorevska brda zvanično je pušten u rad sistem vodosnabdijevanja pitkom vodom domaćinstava Nahoreva, Nahorevskih brda, Muharemovića i Selja. Ovim je okončan najveći projekat komunalne infrastrukture u općini Centar u posljednjih 20 godina, u koji je Općina uložila više od dva miliona maraka. Načelnik Općine Centar dr. Nedžad Ajnadžić je ovom prilikom kazao: -Nakon našeg višegodišnjeg truda i rada okončali smo projekat vodosnabdijevanja na ovom veoma značajnom i bitnom dijelu općine Centar. U njegovu realizaciju smo utrošili mnogo rada, truda, vremena i finansijskih sredstava, ali kad vas vidim kako ste zbog toga sretni mogu reći da se isplatilo. Želim se zahvaliti Općini Stari Grad koja je uz velike napore riješila krupne probleme za kratko vrijeme, Vladi KS koja je u dva saziva stalno davala punu podršku ovom projektu proglašavajući ga od javnog interesa, te želim istaći jedinstvenost političkog stava svih vijećnika Općinskog vijeća Centar, kada je ovaj projekat u pitanju. Puštanjem u pogon ovog sistema Općina Centar nije završila projekat vodosnabdijevanja svojih naselja. U planu je izgradnja 3.170 metara novog cjevovoda za još 105 domaćinstava, te izgradnja dodatnog rezervoara za vodu iz kojeg će biti snabdijevana domaćinstva na Gornjim Poljinama i Gornjem Kromolju. Također je u završnoj fazi izrada potrebne dokumentacije za izvorište Uroševo vrelo odakle će

naselja Radava i Alapi dobijati vodu, objasnio je načelnik Ajnadžić i dodao: -Zadovoljan sam što smo u relativno kratkom vremenskom periodu realizovali projekat koji nije bio nimalo jednostavan. Suočavali smo se sa nizom problema prije početka realizacije, ali i u samom toku, međutim postigli smo naš krajnji cilj, a to je da vodu dobiju svi oni koji je čekaju toliko godina. Stručnjaci su istakli da će kapacitet rezervoara biti dovoljan da napaja sva domaćinstva u ovim naseljima i to je ono što smo i željeli. Ono što me najviše raduje jesu reakcije ljudi koji ovdje žive, naglasio je Ajnadžić. Lokalni stanovnici zahvalili su se načelniku Ajnadžiću i Općinskom vijeću kazavši da se ostvario njihov dugo sanjani san. -Ovo je najhumanija investicija Općine Centar, na čemu smo neizmjereno zahvalni. Nakon trideset godina čekanja, konačno ćemo se napiti vode u svojim

domovima. Siguran sam da će realizacija ovog projekta doprinijeti razvoju ovog kraja, prije svega mislim na poljoprivrednu proizvodnju, istakao je Hamid Smječanin, stanovnik Nahorevskih brda. - Ne mogu vam opisati koliko sam danas sretan kao stanovnik naselja Nahoreva. Zahvaljujući Općini Centar nećemo više iz buradi i kanistera koristiti i piti vodu. Svi smo mi svjesni kakav težak put se prošao dok nismo dobili vodu u svojim kućama, što je jedan od preduslova razvoja ovog kraja poput poljoprivredne proizvodnje. Mišljenja sam da stanovnici ovog dijela općine Centar trebaju nastaviti podupirati i druge projekte koje realizuje naša Općina, što će imati za cilj bolje uslove življenja, izjavio je Munib Pandžić, stanovnik Nahoreva. Podsjećamo da je Općinsko vijeće na 16. redovnoj sjednici održanoj 30. oktobra 2017. donijelo Odluku o korištenju pitke vode bez naknade sa rezervoara Nahorevska brda u prva tri mjeseca u periodu isprobavanja novog vodovoda. Prema ovoj odluci, ukoliko se u tom periodu ne izabere pravno lice za isporuku, obračun i naplatu vode, kao i održavanje, zaštitu i nadzor vodovodnog sistema, ovaj rok se može produžiti najduže još tri mjeseca. Nakon toga, domaćinstvima koja koriste vodu iz rezervoara Nahorevska brda naknada će se obračunavati u skladu sa Odlukom Vlade Kantona Sarajevo o cijeni usluge vodosnabdijevanja. Općinsko vijeće je također odobrilo da se u početnom periodu potpiše ugovor sa Zavodom za javno zdravstvo Kantona Sarajevo koji će biti zadužen za kontrolu zdravstvene ispravnosti pitke vode iz novoizgrađenog vodovoda Nahorevo.



# Šest toplijih i ljepših zgrada u Centru

U okviru projekta postavljanja termo fasada na objekte kolektivnog stanovanja kojeg zajednički financiraju stanari zgrada i Općina Centar, okončani su radovi na svih šest stambenih zgrada koje su uključene u ovaj projekat u ulicama Bolnička 50, Kaptol 28, Kalemova 38, Franca Lehara 13, Derebent 24-26 i Branilaca Sarajeva 4. Riječ je o projektu gdje Općina Centar iz svog budžeta sufinansira dio radova, najviše do 50 posto od ukupne vrijednosti, dok ostatak sredstava moraju prikupiti stanari stambene zgrade kolektivnog stanovanja. Općina Centar je za ovu namjenu u prošlogodišnjem budžetu izdvojila 110.185 KM koje su upraviteljima raspoređene na sljedeći način: „Epismont“-Bulevar Franca Lehara 13 (29.427 KM), „OKI upravitelj“ –Derebent 24-26 (14.756 KM), te Bolnička 50 (15.241 KM), „Sarajevostan“-Branilaca Sarajeva 4 (17.321 KM), „Fidges upravitelj“-Kaptol 28 (20.840 KM) i Kalemova 38 (12.600 KM). Zadovoljstvo kvalitetno izvedenim

radovima izrazio je Almedin Burek, predstavnik stanara objekta u Kalemovoj ulici na broju 38. –Veoma smo zadovoljni urađenim poslom. Naša zgrada je sa vanjske strane bila toliko oštećena da se vidjela cigla. Sada osim uštede na plinskom grijanju, koje je uvedeno u zgradu, također je i estetski izgled zgrade puno bolji. Očekujemo da ćemo sva naša ulaganja u postavljanje fasade na zgradu vratiti za nekoliko godina kroz uštede na grijanju, objasnio je Almedin. Kako je najavio načelnik Općine Centar dr. Nedžad Ajnadžić, ovaj projekat ima za cilj povećanje energetske i ekološke efikasnosti, te uljepšavanje centralne gradske općine, a od ove godine osim objekata kolektivnog stanovanja će obuhvatiti i objekte individualne gradnje. Na osnovu Odluke Općinskog vijeća Centar o sufinansiranju izrade termo fasada – utopljanja stambenih zgrada, u martu prošle godine raspisan je javni poziv upraviteljima stambenih



zgrada kolektivnog stanovanja da dostave zahtjeve za sufinansiranje postavljanja termo fasada. Nakon provedene procedure, Općinsko vijeće je na 12. redovnoj sjednici, održanoj 22. juna 2017. godine, usvojilo listu na kojoj je šest stambenih zgrada na pomenutim adresama.



## 4 ZAŠTITA OKOLIŠA

### JAVNE POVRŠINE ZA KUĆNE LJUBIMCE

Načelnik Općine Centar dr. Nedžad Ajnadžić izdao je nalog općinskoj Službi za prostorno uređenje i komunalne poslove za utvrđivanje lokacija, na postojećim zelenim površinama, za izvođenje kućnih ljubimaca u šetnju. Realizacija ove ideje ima za cilj određivanje prostora za izvođenje i igru kućnih ljubimaca, po uzoru na mnoge zemlje Evropske unije, u kojima su određeni posebni „parkovi za pse“ koji su fizički odvojeni od dječijih igrališta i ostalih zelenih površina.

Načelnik Ajnadžić je zajedno sa saradnicom iz Službe za prostorno uređenje i komunalne poslove Aninom Dedović i savjetnicima Mustafom Resićem i Bećinom Sirovinom, obišao nekoliko lokacija među kojima je i park kod Druge gimnazije između ulica Alipašina i Koševo.

Ovom prilikom su u postojećem parku, gdje je u toku obnova pješačkih staza i mobilijara, istražene mogućnosti za odvajanje djela ovog parka za potrebe izvođenja kućnih ljubimaca, a gdje je potrebno ispuniti i određene arhitektonsko-tehničke uslove.

Ovom prilikom Dedović je naglasila da je pomenuta općinska služba našla još jednu odgovarajuću lokaciju kod stadiona „Asim Ferhatović Hase“ na Koševu, koja gabaritima i položajem u potpunosti odgovara da bude „park za pse“.



### DONACIJA OPĆINE

## Općina Centar i KJKP „Rad“ finansirali nabavku električnog vozila za prikupljanje otpada

Na Obali Maka Dizdara kod mosta „Festina lente“ upriličena je primopredaja Kantonalnom javnom komunalnom preduzeću „Rad“ specijalnog električnog vozila za prikupljanje otpada na javnim površinama. Načelnik Općine Centar dr. Nedžad Ajnadžić predao je električno vozilo direktoru preduzeća „Rad“ Selimu Babiću, koji se zahvalio za dosadašnji doprinos ove lokalne zajednice koja godinama finansira kupovinu neophodne opreme pomenutom preduzeću. Općina Centar Sarajevo i Kantonalno javno komunalno preduzeće „Rad“ zajednički su finansirali kupovinu električnog vozila za prikupljanje otpada na gradskim ulicama. Vrijednost vozila je 89.973 KM, od čega je Općina obezbijedila 40.000 KM, a „Rad“ 49.973 KM.

-Ovo je jedno vrlo kvalitetno vozilo i zahvaljujemo se Općini Centar. Nabavka ovog vozila u značajnoj mjeri povećat će efikasnost našeg posla na terenu. Vozilom se jednostavno rukuje, može doći svugdje pa omogućava djelotvoran rad bez ometanja prometa i idealno je rješenje za sakupljanje otpada na lokacijama gdje je korištenje klasičnih vozila nemoguće, naglasio je Babić. Načelnik Ajnadžić je istakao da na ovaj način Općina Centar još jednom pokazuje svoju opredijeljenost za očuvanje okoliša i čistoću grada.

-Nabavljeno vozilo će se koristiti za čišćenje javnih površina na području

općine Centar. Vozilo je jednostavno za upotrebu, ekonomično i ekološki prihvatljivo jer ne pravi buku niti zagađuje okolinu. Sa ovakvim projektima ćemo nastaviti i u budućnosti jer zajedno trebamo uložiti maksimalne napore da održavamo čistoću grada, dodao je Ajnadžić.

Središnja sarajevska Općina i u proteklom godinama finansirala je nabavku uređaja za potrebe komunalnog preduzeća „Rad“, koji se koriste za održavanje čistoće na pješačkim stazama i drugim javnim površinama u centralnom dijelu općine i grada Sarajeva.





## Objavljen međunarodni tender za izvođača radovana rekonstrukciji kosog lifta na Ciglanama

U vezi sa dugogodišnjim hroničnim i ponovo aktuelnim problemom funkcionisanja kosog lifta u naselju Ciglane Općina Centar je ponudila rješenje. U skladu sa zaključcima Općinskog vijeća Centar Sarajevo donesenim u prethodnom sazivu, načelnik Općine Centar Sarajevo dr. Nedžad Ajnadžić je organizovao više sastanaka sa predstavnicima Ministarstva saobraćaja Kantona Sarajevo, Zavoda za izgradnju Kantona Sarajevo i KJKP Gras u cilju iznalaženja što bržeg rješenja kojim bi se konačno izgradio novi lift i stanarima trajno omogućilo da uredno koriste ovo sredstvo saobraćaja.

S obzirom da je na zemljištu na kojem je izgrađen lift nosilac prava raspolaganja (vlasnik) Zavod za izgradnju Kantona Sarajevo i da po zakonu Općina ne može graditi nikakav objekat na tuđem zemljištu, općinski načelnik je uputio zahtjev Zavodu za izgradnju KS prijedlog ugovora o zajedničkoj izgradnji objekta kosi lift na Ciglanama.

Sušтина ovog ugovora je da Zavod za izgradnju KS

u izgradnju objekta uloži zemljište, a da Općina Centar finansira sve druge troškove, odnosno izgradnju novog, modernog i funkcionalnog lifta sredstvima iz vlastitog budžeta, te da nakon izgradnje lifta preuzme obavezu upravljanja i održavanja nad ovim objektom.

U tom smislu Općina je u budžetu za 2018. godinu obezbijedila sredstva za početak izgradnje i pripremila idejna rješenja novog lifta u skladu sa najvišim standardima izgradnje ovih objekata u Evropi.

U cilju dinamiziranja realizacije projekta izgradnje kosog lifta Općina Centar je 20. aprila 2018. godine raspisala otvoreni postupak javne nabavke sa međunarodnom objavom za izbor izvođača na rekonstrukciji kosog lifta na Ciglanama.

Načelnik Ajnadžić očekuje da će na prijedlog kantonalne Vlade Skupština KS u najkraćem roku podržati predloženi tekst ugovora i time omogućiti da Općina Centar odmah nakon izbora izvođača u ovoj građevinskoj sezoni krene u realizaciju projekta.





## MZ "CIGLANE - GORICA"

# Merhemića trg u novom ruhu

Na radost naših sugrađana završeni su radovi na uređenju dijela Merhemića trga na Ciglanama. Općina Centar Sarajevo finansirala je prvu fazu rekonstrukcije trga, a vrijednost projekta iznosi 549.000 maraka.

Za izvođenje radova bile su zadužene firme „Bosman“ i „Sela“ koje su odabrane kao najpovoljniji ponuđači.


Na centralnom dijelu Merhemića trga postavljene su nove ploče, izgrađena rampa za invalide i stepeništa oko platoa. Izgrađena je nova fontana sa šest nivoa obrađenih granitom u obliku kvadrata, a poseban ambijent stvara led rasvjeta. Kako je predviđeno projektom, na dijelu trga površine od 600 metara kvadratnih uz pješačku zonu postavljen je i parkovski mobilijar sa zasadima stabala. Također, ugrađeni su tzv. potopni stubovi na ulazu na trg iz Ulice Husrefa Redžića, čija je uloga sprečavanje nelegalnog parkiranja vozila.

Koliki je značaj realizacije ovog projekta za stanovnike Ciglana pojasnila je predsjednica Savjeta Mjesne zajednice „Ciglane-Gorica“ Sandra Gluhić.

-Donedavno je ovaj trg bio samo plato koji je imao ulogu improviziranog parkinga, i koliko god smo pokušavali spriječiti nelegalno parkiranje, nismo u tome uspijevali. A sada je, zahvaljujući Općini Centar, ovaj prostor učinjen

pristupačnijim za okupljanje naših sugrađana koji će bezbrižno moći šetati i uživati u ljepotama našeg trga. Završetak prve faze radova na uređenju Merhemića trga umnogome je doprinosa da naša mjesna zajednica bude mjesto ugodnijeg življenja, istakla je Gluhić. Načelnik Općine Centar dr. Nedžad Ajnadžić je iskazao zadovoljstvo zbog završetka radova i najavio i drugu fazu uređenja Merhemića trga.

-Sjećam se dana kada smo sjedili u ovoj mjesnoj zajednici i obećavali, a evo došao je dan kada smo ono što smo obećali i ispunili. Sa ovim nije završeno, nastavljamo i drugu fazu uređenja trga, kako bi on u cjelosti bio obnovljen. Predstavnicima Savjeta Mjesne zajednice ću danas uručiti daljinske upravljače za potopne stubiće, i vjerujem kako će oni s njima postupati savjesno i isključivo u hitnim slučajevima. Moramo biti dobri domaćini i savjesni građani. Trebamo čuvati ono što smo skupo platili, da nam što duže traje. Preko puta nas u toku je izgradnja biciklističke staze koja će povezivati Alipašinu ulicu sa parkom na Jezeru. Kada je u pitanju problem saobraćaja u mirovanju, u narednom periodu planiramo graditi podzemnu garažu na Merhemića trgu, ali i staviti u funkciju parkirališta u tunelu na Ciglanama. Gorući problem stanovnika



Donedavno je ovaj trg bio samo plato koji je imao ulogu improviziranog parkinga



ovog mjesnog područja je kosi lift. Spremi smo u potpunosti preuzeti upravljanje kosim liftom na Ciglanama, a naš jedini uslov je da se riješe imovinsko-pravni odnosi. Smatramo da je najbolje rješenje izgradnja novog modernog lifta i mi za to imamo obezbijeđene novce, poručio je Ajnadžić.



# Ulica Maria Mikulića više nije slijepi krak

Načelnik Općine Centar dr. Nedžad Ajnadžić, zajedno sa svojim saradnicima, obišao je lokaciju u Ulici Maria Mikulića na Koševskom brdu gdje su okončani radovi na asfaltiranju nove saobraćajnice koja spaja dva odvojena dijela pomenute ulice. Ovom prilikom načelnik Ajnadžić je razgovarao sa stanovnicima ovog dijela Ulice Maria Mikulića kojima je sada trajno riješeno jedno važno životno pitanje nakon 38 godina i koji su naglasili da sa ovim projektom svi stanovnici ulice mogu biti samo na dobitku.

-Drago mi je da smo okončali ovaj projekat na zadovoljstvo svih, jer administracija Općine Centar želi da realizuje što više ovakvih projekata od društvenog in-

teresa koji će u konačnici poboljšati standard života naših građana. Nadležnoj Službi za prostorno uređenje i komunalne poslove ću izdati nalog da se postave zaštitne rukohvatne ograde duž izgrađenih potpornih zidova, ubaci nova rasvjeta sa LED sijalicama, te postave parkovske klupe za odmor, objasnio je Ajnadžić.

Općina Centar je finansirala ovaj projekat u iznosu od 97.000 KM i tokom njegove realizacije su izgrađeni novi armirano-betonski potporni zidovi koji imaju ulogu stabilizacije saobraćajnice kao i tla oko stambenih objekata, te je postavljen novi tamponski sloj, kao i betonski ivičnjaci sa obje strane pješačke staze. Nova saobraćajnica je duga 70, a široka tri metra.



# Ulica Armije Republike Bosne i Hercegovine

Postavljanjem tabli sa natpisom na kojima stoji Ulica Armije Republike Bosne i Hercegovine zvanično je završena procedura davanja imena jednoj od najdužih ulica u Centru, od skoro četiri kilometra, između porodilišta na Jezeru i Poljina.

Ulica je dobila naziv u čast svih koji su učestvovali u odbrani i očuvanju države Bosne i Hercegovine od napada agresorskih snaga tokom odbrambeno-oslobodilačkog rata 1992-1995. godine.

Ukupno je na pomenutom lokalitetu dodijeljeno 108 kućnih brojeva, te postavljeno 20 tabli sa nazivom Ulice Armije Republike Bosne i Hercegovine.

Predsjedavajuća Općinskog vijeća Centar Karolina Karačić istakla je da moramo poštovati našu historiju, te da je ovo jedan od načina na koji se čuva istina i sjećanje od zaborava.

-Ova ulica treba da nas podsjeća na sve pripadnike Armije Republike Bosne i Hercegovine koji su časno branili našu državu, kazala je

Karačić.

Načelnik Općine Centar dr. Nedžad Ajnadžić je također naglasio da se istina i sjećanje moraju sačuvati od zaborava, jer ljudi su često skloni zaboravljanju.

-Dužni smo pamti i podsjećati na historijske vrijednosti i odavati dužno poštovanje onima koji su dali život za odbranu države. Stanovnici ovih naselja su dugi niz godina bili bez naziva

ulice i kućnih brojeva, a mi smo im dali obećanje da će se to promijeniti. Ponosni smo što je Sarajevo konačno dobilo ulicu koja nosi ime po Armiji Republike Bosne i Hercegovine, naglasio je Ajnadžić.

Nakon što je završena procedura davanja imena započeli su i radovi na prvoj fazi rekonstrukcije ulice koja podrazumijeva polaganje novog asfalta i izgradnju pločnika.



## Prva faza izgradnje zgrade za smještaj ruševinaca biće gotova u planiranom roku

Radovi prve faze izgradnje objekta u Ulici Dejzina Bikića na Šipu u kojem će biti smješteni stanari iz ruševnih objekata sa područja općine Centar biće okončani u planiranom roku.

Radi se o objektu u kojem će biti smještene 23 porodice koje će trajno riješiti svoje stambeno pitanje. Za ovu fazu pomenutog projekta, što podrazumijeva grube građevinske radove, Općina Centar je iz svog budžeta izdvojila 505.300 KM, dok je vrijednost cjelokupnog projekta procijenjena na 1.700.000 KM.

Za izgradnju ovog objekta na javnom pozivu je odabrana firma „ITC Zenica“ sa čijim predstavnikom je potpisan okvirni sporazum na dvije godine.

Novi objekat, čiju izgradnju u potpunosti finansira Općina Centar, će imati četiri etaže: suteran i prizemlje, te dva sprata i mansardu sa 23 stambene jedinice i tri poslovna prostora. Površina stanova iznosi od 40 do 70 metara kvadratnih. Kako je sama dinamika radova najviše

uslovljena sa obezbjeđenjem finansijskih sredstava iz općinskog budžeta, upućen je prijedlog za dodatna finansijska sredstva iz rebalansa budžeta Općine Centar za ovu godinu, koji treba biti na dnevnom redu aprilske sjednice Općinskog vijeća Centar. Prva faza ovog projekta podrazumijeva grube građevinske radove sa pokrivanjem objekta.

Nakon okončanja izgradnje ovog objekta i njegovog tehničkog prijema prema utvrđenoj proceduri biće pokrenuta procedura odabira i smještaja porodica iz ruševnih objekata u nove stambene jedinice. Njihovi ruševni objekti koji predstavljaju opasnost za stanare i okolne stambene objekte biće uklonjeni.

Objekat na Šipu je drugi za smještaj porodica iz ruševnih objekata. Prvi je izgrađen u Ulici Sepetarevac 21 koji je završen 2010. godine gdje je smješteno 15 porodica i vrijednost projekta je bila 1.200.000 KM, a sredstva je obezbijedila Općina Centar u svom budžetu.






# Asfaltirane pješačke staze u parku kod Druge gimnazije

Radnici građevinske firme „Sela“ su asfaltirali pješačke staze u parku kod sarajevske Druge gimnazije.

- Kako je predviđeno projektom postavili smo oko 2.200 metara kvadratnih novog asfalta. Sa okončanjem ovih radova završili smo projekt sanacije pješačkih staza u parku kod Druge gimnazije, objasnio je Mesud Zimić, šef gradilišta firme „Sela“.

Pomenuti projekt sanacije je pokrenut jer su postojeće pješačke staze bile u veoma lošem stanju, dotrajale sa ispucalim asfaltom a pojedini dijelovi staza su potpuno obrasli travom. Stoga je Općina Centar iz svog budžeta izdvojila 127.000 KM za ovaj projekat tokom čije realizacije je nakon uklanjanja stare podloge postavljen novi tampon i podloga, te novi betonski ivičnjaci sa obje strane pješačkih staza. Za nesmetan pristup osobama u invalidnim kolicima iz Ulice Koševo izgrađena je nova pristupna rampa dužine 25 metara, na koju su postavljene kulir ploče kao i zaštitna ograda sa obje strane rampe.





# Izgradnja biciklističke staze u Alipašinoj ulici

Izgradnja biciklističke staze koja povezuje Alipašinu ulicu sa parkom na Jezeru nastavljena je i tokom ove godine. Općina Centar je u svom budžetu za 2018. godinu izdvojila iznos od 336.184 KM za realizaciju druge faze ovog projekta. Načelnik Općine Centar dr. Nedžad Ajnadžić je dao saglasnost za pokretanje procedure realizacije druge faze ovog projekta. Građevinska firma "Grakop" iz Kiseljaka već izvodi radove na izgradnji prve faze biciklističke staze, za šta je također finansijska sredstva obezbijedila Općina Centar u iznosu od gotovo 300.000 KM.

Kako je objasnio Mujo Topalović, šef gradilišta građevinske firme „Grakop“, do snježnih padavina okončano je oko 70 posto planiranih radova prve faze izgradnje biciklističke staze.

-Prva faza ovog projekta odnosi se na dionicu od Ulice Sutjeska do ulaza u kompleks Zetra, ukupne dužine 841 metar. Nakon uklanjanja postojećih kocki i ivičnjaka na dionici od Ulice Sutjeska do pijace Ciglane, ugradili smo novu betonsku podlogu i počeli smo sa vraćanjem postojećih te ugradnjom novih betonskih kocki na dijelu koji će služiti kao pješačka staza. Preostala je još dionica od Energopetrolove pumpe do glavnog ulaza u Zetru, što iznosi oko 150 metara. Na kraju radova bit će izvršeno asfaltiranje nove biciklističke staze te postavljanje vertikalne i označavanje horizontalne saobraćajne signalizacije, objasnio je Topalović.

Druga faza izgradnje obuhvata dionicu od ulaza u kompleks Zetra do parka Jezero dužine 802 metra. Ukupna dužina biciklističke staze iznosi oko 1.644 metara. Završna podloga biciklističke staze će biti asfalt obojen u crvenu boju. Sa realizacijom ovog projekta biciklisti i pješaci će imati nesmetanu putnu komunikaciju do parka na Jezeru gdje će moći uživati u najvećoj gradskoj zelenoj oazi, o kojoj također brigu vodi Općina Centar.



# Uređenje Trga Prvog korpusa Armije RBiH u završnoj fazi


Tokom proteklog perioda radnici angažovane građevinske firme „Sela“ su započeli sa popločavanjem pješačkih staza na Trgu Prvog korpusa Armije RBiH, koji je smješten ispred zgrade Općine Centar i Kantona Sarajevo. Pomenuti radovi predstavljaju završnu fazu uređenja ovog trga čiji je finansijer Općina Centar.

-Sav dostavljeni materijal, a riječ je o pločama od kamena hreša, odmah ugrađujemo. Samu dinamiku radova nam diktira mogućnost dobavljača da što brže dostavlja materijal potreban za ugradnju u nove pješačke staze. Također, osim novih gazišta, duž pješačkih staza, planiramo sve polomljene kamene ploče na parapetima zamijeniti novim. Osim ovih radova imamo još da uredimo oštećenu kamenu ogradu preko mosta koji povezuje ovaj trg i Ulicu Hamze Hume. Ovdje je prema predmjeru i predračunu predviđeno postavljanje novih ploča duž ograde ovog mosta, objasnio je Mesud Zimić, šef gradilišta firme „Sela“.

Općina Centar je za realizaciju ovog projekta, koji je bio podijeljen u tri faze, iz svog budžeta izdvojila 427.000 KM.

U okviru ovog projekta će mašinski ili ručno biti ugrađeno 1.000 metara kvadratnih kamenih kocki i ploča, dok će na parapetima, izdignutim dijelovima parka u kojima se nalaze zelene površine, biti postavljeno 637 kamenih blokova raznih dimenzija. Umjesto drvenih parkovskih klupa biće postavljene kamene, koje su trajnije i otpornije na vanjske vremenske uvjete. Također, planirano je uređenje i stavljanje u funkciju fontana, te izrada šahta i rešetke za odvod površinskih voda. Na kraju radova

na obnovi ovog trga planirano je i hortikulturno uređenje zelenih površina, kao i završno čišćenje parka površine gotovo 3.100 metara kvadratnih. Obnovljeni park će također dobiti novu led rasvjetu.



# „Sunčana jedra“ ponovno prekrila Ferhadiju



Sa poboljšanjem vremenskih prilika i očekivanim povećanjem temperatura zraka sa dolaskom ljetnih mjeseci, Općina Centar Sarajevo i firma „Samas“ su i ove godine realizovali zajednički projekat postavljanja „sunčanih jedara“ u ulicama u užem gradskom jezgri.

Kao i prošle godine „sunčana jedra“ su postavljena u Ulici Ferhadija, odnosno na dionici od Vječne vatre do Gradske tržnice. Reakcije građana na prošlogodišnji projekat su veoma pozitivne, gdje su osim lijepo ukrašenog šetališta u Ferhadiji također dobili i efikasnu zaštitu od sunca tokom vrelih dana toplog prošlogodišnjeg ljeta.

Namjera načelnika Općine Centar dr. Nedžada Ajnadžića je da se „sunčana jedra“ postave na još nekoliko lokacija u užem centru grada, što će predstavljati naredne faze ovog projekta. Svi koji posjete grad i općinu Centar sa sobom će ponijeti mnoštvo lijepih uspomena i atraktivnih fotografija među kojima su i „sunčana jedra“.

## Općina Centar podržava inicijativu da se ispred Pozorišta mladih uredi Trg kulture - Jurislav Korenić

Načelnik Općine Centar Sarajevo dr. Nedžad Ajnadžić je zajedno sa predsjedavajućom Općinskog vijeća Centar Karolinom Karačić i dopredsjedavajućim Vijeća Mustafom Mulićem i saradnicima održao sastanak sa sarajevskim kulturnim djelatnicima povodom inicijative da se ispred sarajevskog Pozorišta mladih ukloni parking i ponovo uspostavi trg koji će se zvati Trg kulture – Jurislav Korenić, koji je bio jedan od najzaslužnijih utemeljitelja bosanskohercegovačkog teatra.

Sastanku su prisustvovali i članovi Komisije Općinskog vijeća Centar za javna priznanja i obilježavanje historijskih događaja i ličnosti koji su sa poznatim bosanskohercegovačkim glumcem Emirom Hadžihafizbegovićem pokrenuli pomenutu inicijativu kojoj su svi prisutni na ovom sastanku dali jednodušnu podršku te su dogovoreni naredni koraci da se ona i realizira.

Načelnik Ajnadžić je naglasio da rukovodstvo Općine u potpunosti podržava inicijativu da se ispred sarajevskog Pozorišta mladih ukloni parking i ponovo uspostavi trg koji će se zvati Trg kulture – Jurislav Korenić i predložio zaključke koje su svi učesnici sastanka prihvatili.

Inicijativa će biti upućena Općinskom vijeću u redovnu proceduru tokom koje će biti održana i javna rasprava na zboru građana Mjesne zajednice „Trg oslobođenja-Centar“. Uporedo s tim radit će se izmjene i dopune planske dokumentacije po redovnoj proceduri. Služba za prostorno uređenje i komunalne poslove Općine Centar će uputiti zahtjev Ministarstvu saobraćaja Kantona Sarajevo i Kantonalnom javnom komunalnom preduzeću „Rad“ za izmještanje parkinga i raditi na iznalaženju adekvatnog privremenog rješenja uređenja trga sa pripadajućim urbanim mobilijarom, s obzirom na činjenicu da je na toj lokaciji u budućnosti planirana izgradnja podzemne javne garaže.

Osim Emira Hadžihafizbegovića sastanku su prisustvovali direktorica sarajevskog Narodnog pozorišta Marijela Hašimbegović, predsjednica Upravnog odbora Pozorišta mladih Sanela Dumanjić i predstavnik firme „Bosnia hoteli“ Enver Malagić.



## NASTAVAK PODRŠKE FK SARAJEVO

Središnja sarajevska Općina nastavlja dugogodišnju praksu pomaganja sportskim kolektivima koji na najbolji način predstavljaju Bosnu i Hercegovinu u svijetu. Tim povodom je načelnik Općine Centar dr. Nedžad Ajnadžić zajedno sa saradnicima posjetio Fudbalski klub Sarajevo gdje su ih ugostili generalna direktorica Sabrina Buljubašić i generalni sekretar Mirza Hadžić.

Povod posjete bio je potpisivanje zaključka kojim se iz budžeta Općine Centar izdvaja 8.000 KM Fudbalskom klubu Sarajevo za podršku u radu.

Načelnik Ajnadžić je kazao da ova lokalna zajednica već godinama finansijski pomaže rad FK Sarajevo, ali i mnogih drugih sportskih kolektiva, te da će ta praksa biti nastavljena i u budućnosti.

-Iskreno se nadam da će donirana sredstva biti od koristi za vaš klub, a u cilju postizanja što boljih rezultata. Ovo je prva tranša za ovu godinu, a podrška će sigurno biti nastavljena. Visoki prioritet Općine Centar je dovođenje Olimpijskog stadiona „Asim Ferhatović Hase“ na Koševu u stanje da se na njemu mogu odigravati međunarodne utakmice i to je direktna pomoć Fudbalskom klubu Sarajevo i društvenoj zajednici. Općina Centar i Vlada Kantona Sarajevo će iz svojih budžeta izdvojiti po 500.000 KM za realizaciju projekta modernizacije stadiona „Asim Ferhatović Hase“ na Koševu. Ova faza modernizacije podrazumijeva pojačanje rasvjete na reflektorima i sportskom semaforu, opremanje sobe za centralno upravljanje sistemom sigurnosti na stadionu, uređenje prostora za zagrijavanje rezervnih igrača, te proširenje prostora sa klupama za smještaj stručnih štabova i rezervnih igrača. Objavljen je i međunarodni javni poziv za iskazivanje interesa za modernizaciju stadiona na Koševu, pojasnio je Ajnadžić. Direktorica Buljubašić se zahvalila načelniku Ajnadžiću na podršci i razumijevanju koje ova lokalna zajednica ima prema sportskim klubovima.

-I nama u klubu je od izuzetnog interesa da se stadion rekonstruiše, uz ispunjavanje visokih standarda FIFA-e i UEFA-e. Želimo da stadion na Koševu dobije moderni novi izgled i dajemo punu podršku Općini Centar u nastojanjima da se krene u realizaciju modernizacije stadiona, istakla je Buljubašić.

# Preko 1000 m besplatno ba



Općina Centar iz godine u godinu obezbjeđuje sve značajnija sredstva za sport, iako ta oblast nije u njenoj direktnoj nadležnosti. Sport je izazov današnjice za mlade ljude, a društvena zajednica ima zadatak da ih usmjerava na ispravan put i u tom smislu Općina je realizujući mnogobrojne projekte u proteklom periodu pokazala svoje opredjeljenje da pomogne razvoj sporta i sportista, ne samo u Centru već i u cijeloj Bosni i Hercegovini.

Općina Centar je sa projektom „365 sport plus“ otišla najdalje kada je u pitanju istinska podrška sportu. Kao što je javnost upoznata, Općina Centar je putem JU Centar za sport i rekreaciju pokrenula navedeni projekat u okviru kojeg sva djeca sa područja ove lokalne zajednice imaju mogućnost da u potpu-



# Mališana se potpuno bavi sportom



nosti besplatno treniraju devet različitih sportova. Mališanima su na raspolaganju nogomet, košarka, rukomet, odbojka, tenis, džudo, mali nogomet i univerzalne škole sporta i borilačkih vještina. Načelnik Općine Centar dr. Nedžad Ajnadžić je prisustvovao jednom od treninga u okviru projekta

365 sport plus.

-Kroz ovaj projekat želimo da 365 dana godišnje mladim ljudima damo šansu da se bave sportom, a da oni za to ne moraju izdvajati novac. Naš fokus su djeca iz 11 osnovnih škola iz Centra i želimo omasoviti bavljenje sportom. Raduje me što za ovaj projekat vlada veliko interesovanje a što je razlog da se i u budućnosti nastavi njegova realizacija. Želimo da naša djeca budu ambasadori ove zemlje i da nas na najbolji mogući način predstavljaju u svijetu bilježeći velike sportske uspjehe, naglasio je Ajnadžić.

Damir Jusufbegović, jedan od trenera besplatne škole tenisa, izrazio je zahvalnost Općini Centar i načelniku Ajnadžiću što su prepoznali potrebu ulaganja u sport.

-Mališanima je pružena prilika da nauče osnovne vještine ovog sporta potpuno besplatno. Koristim priliku da se zahvalim načelniku Ajnadžiću što snažno podržava sport, a to je prije svega pokazao ovim projektom „365 sport plus“. Mislim da roditeljima mnogo znači kada mogu svoju djecu uključiti u sportske aktivnosti, a da za to ne moraju izdvajati novac. Imamo jako talentiranu, motorički sposobnu i pametnu djecu u koju treba ulagati i vrijeme i novac, kazao je Jusufbegović.

Prisutni roditelji i mališani također su izrazili zahvalnost načelniku Ajnadžiću što imaju priliku kvalitetno upotrijebiti svoje slobodno vrijeme i to potpuno besplatno.

*Kalendar, odnosno raspored i satnica termina mogu se vidjeti na web stranici Općine Centar u rubrici „365 sport plus“ ili na linku <http://www.centar.ba/stranica/365-sport-plus>*



# Predstavnicima UEFA-e u obilasku stadiona Asim Ferhatović Hase

Inspektori iz Unije evropskih fudbalskih asocijacija (UEFA) obišli su stadion „Asim Ferhatović Hase“ na Koševu, a u cilju kontrole o ispunjavanju kriterija koje propisuju FIFA i UEFA za održavanje međunarodnih utakmica.

U okviru posjete stadionu održan je i sastanak na kome su osim najavljene delegacije UEFA-e također bili prisutni predstavnici Općine Centar na čelu sa načelnikom dr. Nedžadom Ajnadžićem, Javne ustanove „Centar za sport i rekreaciju“ i Nogometnog saveza Bosne i Hercegovine.

Ovom prilikom su predstavnici Općine prezentirali konkretne korake na modernizaciji stadiona na Koševu koje je poduzela ova lokalna zajednica u saradnji sa Ministarstvom kulture i sporta Kantona Sarajevo, za šta su zajedno izdvojili milion maraka.

Podsjećamo da su 29. decembra 2017. godine ministar kulture i sporta Kantona Sarajevo Mirvad Kurić i načelnik Općine Centar dr. Nedžad Ajnadžić potpisali sporazum o sufinansiranju realizacije projekta modernizacije stadiona „Asim Ferhatović Hase“ na Koševu. Prema pomenutom sporazumu Općina Centar i Vlada KS će iz svojih budžeta izdvojiti po 500.000 KM za realizaciju ovog projekta. Ova faza modernizacije podrazumijeva pojačanje rasvjete na reflektorima i sportskom semaforu, opremanje sobe za centralno upravljanje sistemom sigurnosti na stadionu, uređenje prostora za zagrijavanje rezervnih igrača, te proširenje prostora sa klupama za smještaj stručnih štabova i rezervnih igrača.

U okviru pomenutog sastanka na stadionu na Koševu načelnik Ajnadžić je potpisao ugovor sa odabranim izvođačem radova koji je zadužen za pojačanje rasvjete na reflektorima na stadionu „Asim Ferhatović Hase“, što je jedan od uvjeta za odigravanje međunarodnih utakmica koje su propisale FIFA i UEFA. Kao najpovoljniji izvođač radova odabrana je firma „SES“ d.o.o. Sarajevo čiji je direktor Ibrahim Dedović potpisao pomenuti ugovor. Vrijednost ugovora je 291.833,86 KM, a radove u cjelosti finansira Općina Centar.

Načelnik Ajnadžić je podsjetio da je Općina Centar objavila i otvoreni javni međunarodni poziv za iskazivanje tržišnog interesa potencijalnih privatnih partnera za realizaciju projekta modernizacije kompleksa stadiona „Asim Ferhatović Hase“.

-Naše opredjeljenje je da stadion na Koševu dovedemo do nivoa za odigravanje međunarodnih utakmica, a taj proces vodimo na dva kolosijeka. Putem Centra za sport i rekreaciju i uz podršku Općinskog vijeća Centar provedena je procedura za pojačanje rasvjete na reflektorima i sportskom semaforu, a evo danas smo potpisali i ugovor tako da izvođač odmah počinje sa radovima. Također je objavljen javni poziv za odabir izvođača radova na opremanju sobe za centralno upravljanje sistemom sigurnosti na stadionu. Osim toga, planiramo





- Modernizacija podrazumijeva pojačanje rasvjete na reflektorima i sportskom semaforu, opremanje sobe za centralno upravljanje sistemom sigurnosti na stadionu

uraditi proširenje prostora sa klupama za smještaj stručnih štabova i rezervnih igrača, kao i urediti prostor površine od 150 metara kvadratnih za zagrijavanje rezervnih igrača. U narednom koraku u saradnji sa Nogometnim savezom BiH, za šta planiramo obezbijediti novčana sredstva rebalansom budžeta, idemo na zamjenu kompletne travnate površine i tada ćemo pokušati naći rješenje da uvedemo grijanje na travnjaku stadiona, kazao je Ajnadžić.



# Stipendije za 348 učenika i studenata



U Domu mladih na Skenderiji, organizovano je potpisivanje ugovora sa dobitnicima općinskih stipendija „Prof. dr. Husein Kulenović“ za školsku 2017/2018. godinu.

Ovom prilikom je 348 učenika srednjih škola i studenata potpisalo ugovor na osnovu kojeg će mjesečno dobijati po 80 KM odnosno po 100 KM. Sredstva stipendije obuhvataju period od deset mjeseci, počev od septembra 2017. do juna 2018. godine. Općinska služba za obrazovanje, kulturu i sport će za protekle mjesece isplatiti sredstva na račune potpisnika ugovora.

Prilikom svog obraćanja prisutnima načelnik Općine Centar dr. Nedžad Ajnadžić je kazao da je ovo jako važan dan za one koji žele investirati u znanje i da je veoma ponosan što se danas potpisuju ugovori za dodjelu stipendija.

–Općinska administracija i Općinsko vijeće Centar rade na tome da tokom ove kalendarske godine izdvojimo dodatna sredstva za stipendiste

Općine Centar, za šta iz općinskog budžeta namjeravamo izdvojiti gotovo 500.000 KM. Na taj način želimo pokazati koliko nam je stalo da kroz dobro obrazovanje naši mladi postanu multidisciplinarni i poliglote, te uvaženi građani ove općine, grada Sarajeva, države BiH, kao i Evrope i svjetske zajednice bez granica. Općina Centar svake godine uvećava sredstva za ovu namjenu čime želimo naglasiti našu opredijeljenost da podržimo proces sticanja znanja i postizanja vaših kompetencija u budućem životu, naglasio je Ajnadžić i dodao da stipendije nisu jedina prednost koju Općina Centar pruža mladima. -Ova jedinica lokalne samouprave je posljednjih deset godina iz svog budžeta izdvojila preko sedam miliona konvertibilnih maraka za unapređenje uslova rada i obrazovanja u predškolskim i školskim ustanovama. Također Općina Centar pruža finansijsku podršku stambenom zbrinjavanju mladih te daje nepovratna sredstva do 15.000 KM za samozapošljavanje mladih kroz start-

up projekte, kazao je Ajnadžić. Podsjećamo da je prema odluci Općinskog vijeća Centar na 22. redovnoj sjednici, održanoj 22. februara 2018. godine, odabrano 210 nadarenih učenika srednjih škola i studenata, sa visokim prosjekom ocjena, za dodjelu stipendija „Prof. dr. Husein Kulenović“ za školsku/akademsku 2017/2018. godinu, od čega su 137 srednjoškolca i 73 studenta. Općinsko vijeće je također donijelo odluku o izboru 138 učenika srednjih škola i studenata koji se školuju u otežanim uslovima života za dodjelu stipendija u školskoj/akademske 2017/2018. godini. Po ovom osnovu općinske stipendije dobit će 59 srednjoškolaca i 79 studenata. Za dodjelu 348 stipendija iz ovogodišnjeg budžeta Općine Centar će biti utrošeno 308.000 maraka.

## Besplatno članstvo u Biblioteci Sarajevo



Na sastanku koji je održan u Općini Centar načelnik Općine dr. Nedžad Ajnadžić i direktor Javne ustanove Biblioteke Sarajeva Zlatko Topčić razgovarali su o novom projektu besplatnog upisa novih korisnika ove Biblioteke.

-Općina Centar je u svom budžetu obezbijedila 10.000 KM koje imamo namjeru utrošiti za besplatno učlanjenje mladih iz Centra u Biblioteku Sarajeva. Ukoliko se ukaže potreba spremni smo povećati iznos, te također smo spremni proširiti našu, do sada uspješnu saradnju, sa ovom ustanovom. Jako nam je stalo da što više mladih čita, jer smo svjesni koliko su savremene tehnologije opasne za gubljenje navike čitanja knjiga, kazao je Ajnadžić.

O samoj proceduri upisa novih članova je govorio Zlatko Topčić.

- Ukoliko se ukaže potreba spremni smo uvesti i dodatne termine za upis subotom. Novi korisnici će dobiti člansku kartu koja važi godinu dana. Također imamo u planu, kroz ovaj projekat, obnoviti istekle članarine za naše korisnike s područja ove sarajevske općine, kazao je Topčić. Prilikom upisa korisnici su dužni dati na uvid CIPS-ovu prijavnicu, a maloljetnici upis mogu ostvariti u pratnji roditelja ili staratelja koji posjeduju isti dokument. Članska karta stavlja na raspolaganje bibliotečki fond od preko 260.000 knjiga. Biblioteke Sarajeva su prateći moderne trendove i zahtjeve čitalaca uvele uslugu iznajmljivanja elektronskih čitača knjiga, biblioterapije i Book Crossinga, svojevrsne globalne čitaonice slobodnih, putujućih knjiga. Biblioteka Sarajeva pruža usluge putem najmodernijeg sistema COBISS (kooperativni online bibliografski sistem i servisi) koji je prošle godine uveden na svih šesnaest pozajmnih odjeljenja, a koji omogućuje lakši i brži pristup novim ostvarenjima domaće i strane beletristike, stručne knjige, lektire, časopisa i stripova, ali i besplatno učešće u brojnim radionicama...

## Za obrazovanje 3,8 miliona KM



Iako to nije u njenoj nadležnosti Općina Centar Sarajevo nastavlja sa dugogodišnjom praksom izdvajanja značajnih sredstava iz svog budžeta za unapređenje odgojno-obrazovnog procesa i poboljšavanje uvjeta boravka i rada u predškolskim ustanovama, osnovnim i srednjim školama i na fakultetima, zatim za stipendiranje učenika i studenata, organizaciju školskih takmičenja u znanju, kulturnim i sportskim aktivnostima i drugo.

Tako je u ovogodišnjem općinskom budžetu planirano gotovo 3,8 miliona konvertibilnih maraka za podršku obrazovanju.

U okviru kapitalnih programa Općina Centar je obezbijedila milion i 970 hiljada maraka za nastavak izgradnje osnovne škole u naselju Šip te 925 hiljada maraka za izgradnju odnosno rekonstrukciju devastiranog objekta obdaništa "Razigrani dan" u Ulici Patriotske lige.

Više od 400 hiljada konvertibilnih maraka bit će utrošeno za dodjelu općinskih stipendija „Prof. dr. Husein Kulenović“ srednjoškolcima i studentima sa visokim prosjekom ocjena, ali i za one iz socijalno ugroženih porodica.

Za poboljšanje uslova rada i opremljenosti predškolskih ustanova, osnovnih i srednjih škola, te visokoškolskih ustanova planirano je 150.000 KM.

Na početku svake školske godine Općina daruje prvačićima školske torbe i pribor, a od ove godine i udžbenike, za što je planirano ukupno 102.000 KM. Osim toga, redovno se izdvaja 10.000

KM za poticaj romskoj djeci za redovno školovanje u osnovnim školama na području Centra te 20.000 maraka za podršku obrazovnim ustanovama za projekte prekvalifikacije i vanrednog školovanja pripadnika romske populacije.

U cilju poticanja što boljih rezultata u znanju iz pojedinih nastavnih predmeta (matematike, fizike, geografije, informatike, lektire, tehnike i kulturno-umjetničkog stvaralaštva) Općina je obezbijedila 15.000 KM za organiziranje takmičenja učenika osnovnih škola iz pomenutih oblasti, a 8.000 KM za kupovinu karata učenicima završnih razreda osnovnih škola za pozorišne predstave.

U budžetu Općine Centar za 2018. godinu obezbijedeno je 85.000 maraka za nabavku đачkih užina za učenike osnovnih škola čije su porodice slabijeg imovinskog stanja. Kao i prethodnih godina, osim za učenike iz 11 osnovnih škola sa područja središnje sarajevske općine, besplatne đачke užine će biti obezbijeđene i za djecu iz Centra za slušnu i govornu rehabilitaciju djece i Centra za odgoj, obrazovanje i rehabilitaciju „Vladimir Nador“. Izdvojeno je i 72.000 KM za besplatan prevoz učenika osnovnih škola koji stanuju na većoj udaljenosti od škole, a gdje nemaju uspostavljene odgovarajuće saobraćajne linije javnog gradskog prevoza (škole "Alija Nametak" i "Mehmed-beg Kapetanović Ljubušak") i za prevoz učenika sa poteškoćama u razvoju i njihovih pratilaca.

# Obezbijeđena sredstva za nastavak izgradnje osnovne škole na Šipu



U prostorijama Ministarstva za obrazovanje, nauku i mlade Kantona Sarajevo načelnik Općine Centar dr. Nedžad Ajnadžić i ministar prof.dr. Elvir Kazazović potpisali su Anex II sporazuma o zajedničkom finansiranju izgradnje prve faze objekta osnovne škole na Šipu u 2018. godini kao i drugi ugovor o izvođenju radova, a na osnovu okvirnog sporazuma potpisanog 1. augusta 2017. godine sa direktorom firme Unigradnja d.d. Sarajevo Mustafom Durakovićem. Ovaj višemilionski projekt zajedničkim sredstvima finansiraju

Općina Centar i Ministarstvo za obrazovanje, nauku i mlade Kantona Sarajevo. Kako je riječ o velikoj investiciji projekt se realizira u fazama.

Nakon provedene tenderske procedure za izvođača radova izabrana je firma Unigradnja d.d. s kojom je Općina sklopila Okvirni sporazum o izvođenju radova na izgradnji prve faze škole na Šipu. Ukupna vrijednost Sporazuma koji je sklopljen na period od četiri godine je 5.916.146,30 konvertibilnih maraka. Na osnovu pomenutog sporazuma potpisan je i prvi ugovor u vrijednosti

1.899.927 KM. Osim toga, Općina je ranije izdvojila 640.126,46 KM za naknadu za troškove uređenja zemljišta i 187.800 KM za naknadu za pogodnost zemljišta-rentu.

Ministarstvo za obrazovanje, nauku i mlade Kantona Sarajevo je u budžetu za 2016. godinu obezbijedilo 700 hiljada KM, a u 2017. godini 450 hiljada KM.

Potpisivanjem Anexa II sporazuma o zajedničkom finansiranju izgradnje prve faze objekta osnovne škole na Šipu u 2018. godini Općina se obavezala da izdvoji 400.000 KM, a Ministarstvo 500.000 KM. Ukupna vrijednost drugog ugovora o izvođenju radova iznosi 900.000 maraka.

Načelnik Ajnadžić je naglasio da ga raduje što se radovi odvijaju brže od ugovorenih rokova.

-Riječ je izuzetno važnom projektu za Općinu Centar. Sa izvođačem radova potpisan je Okvirni sporazum na period od četiri godine, a naša očekivanja su da bi radovi mogli biti završeni do kraja 2019. godine, odnosno mnogo prije okončanja zadatih rokova. Koristim priliku da upoznam ministra Kazazovića o dinamici pripremnih aktivnosti za početak gradnje objekta obdaništa „Razigrani dani“ u Ulici Patriotske lige 46. Glavni projekat je završen, a revizija projekta je pri kraju. U narednih nekoliko dana očekujemo da revizija projekta bude dostavljena Općini nakon čega raspisujemo tender za izbor izvođača radova, istakao je Ajnadžić.



## Općina za buduće prvačiće kupuje knjižice, ruksake i školski pribor

Imajući u vidu da je ulaganje u obrazovanje našeg podmlatka najbolja investicija, Općina Centar Sarajevo kao društveno odgovorna lokalna zajednica, predvođena načelnikom dr. Nedžadom Ajnadžićem, godinama redovno izdvaja iz svog budžeta značajna finansijska sredstva za ovu najvažniju oblast društvenog života, iako ona još uvijek nije u općinskoj nadležnosti. Osim redovnih izdvajanja za unapređenje nastavnog procesa i poboljšanje uslova rada i boravka u obrazovnim ustanovama, počev od predškolskog pa do visokog obrazovanja, Općina Centar će od naredne školske godine obezbijediti besplatne udžbenike za sve prvačiće koji se upišu u 11 osnovnih škola na njenom području.

S obzirom na to da u aprilu počinje upis prvačića, kada je prvi upisni rok, Općina Centar želi obavijestiti roditelje budućih školaraca da ne kupuju udžbenike za prvi razred osnovne škole, jer će to učiniti Općina Centar, što će biti praksa i ubuduće. Također će biti nastavljena dosadašnja praksa da početkom nove školske godine, uz želje za sretan početak školovanja, Općina Centar daruje svim prvačićima sa njenog područja ruksake i školski pribor.

Podsjećamo da je u ovogodišnjem općinskom budžetu planirano 102.000 konvertibilnih maraka za nabavku udžbenika, ruksaka i školskog pribora za prvačiće u 11 osnovnih škola. Svake godine na području općine Centar u osnovne škole se upiše oko 600 mališana, te ukoliko ovaj broj nakon aprilskog i augustovskog roka bude i veći, Općina će obezbijediti i dodatna sredstva za opremanje prvačića za početak školovanja.



## Zamjena stolarije na objektu OŠ „Mehmed-beg Kapetanović Ljubušak“

U prostorijama Osnovne škole „Mehmed-beg Kapetanović Ljubušak“ na Koševskom brdu potpisan je ugovor o zamjeni dijela vanjske stolarije na objektu pomenute škole.

U ime Općine Centar, kao finansijera projekta, ugovor je potpisao načelnik dr. Nedžad Ajnadžić, dok je u ime izvođača radova, firme „HDI“ d.o.o. Sarajevo, pomenuti ugovor potpisao direktor Haris Djana.

Za realizaciju ovog projekta Općina Centar je izdvojila 53.425 KM. Potpisivanju ugovora je prisustvovao i v.d. direktor Edin Smajić koji je zahvalio načelniku Ajnadžiću i Općinskom vijeću Centar na donaciji.

– Sa ovom značajnom donacijom Općine Centar za našu školu konačno smo u mogućnosti da riješimo dugogodišnji problem sa zagrijavanjem učionica u našem objektu. Osim smanjenja troškova zagrijavanja prostorija također ćemo sa novom stolarijom dobiti i estetski lijepo uređen objekat što zaslužuju učenici i nastavnici ove škole kao i naselje Koševsko brdo. Zamijenit ćemo vanjsku stolariju, odnosno prozore na četiri kabineta škole, te četiri portala na ulazu u školu kao i na hodnicima. Osim ovog mi smo u okviru povećanja energetske efikasnosti kandidovali dva projekta prema Ambasadi Japana u BiH, a radi se o projektima postavljanja termoizolacione fasade na objekat škole i rekonstrukciju postojeće kotlovnice koja je sada u katastrofalnom stanju, objasnio je Smajić.



Intervju: Karolina Karačić, predsjedavajuća Općinskog vijeća



**Karolina Karačić obavlja dužnost predsjedavajuće Općinskog vijeća Centar 16 mjeseci. U ovom razgovoru se osvrnula na rad Vijeća u ovom sazivu, saradnju sa parlamentarnim strankama kao i sa izvršnom vlasti Općine Centar.**

**Nakon prošlih lokalnih izbora izabrani ste na konstituirajućoj sjednici Općinskog vijeća Centar 16. novembra 2016. godine za predsjedavajuću Vijeća. Molimo da date kratak osvrt na aktivnosti Općinskog vijeća u proteklom periodu.**

Prije svega izrazila bih zadovoljstvo radom Općinskog vijeća Centar u prvoj godini nakon održanih lokalnih izbora 2016. godine. Općinsko vijeće Centar Sarajevo je u protekloj godini održalo 19 redovnih sjednica. Pored redovnih, Općinsko vijeće je održalo i četiri tematske, te pet svečanih sjednica.

U navedenom periodu se razmatralo, raspravljalo i odlučivalo o 287 odluka, rješenja i izvještaja.

Općinsko vijeće je svojim djelovanjem, raspravama i na kraju usvajanjem budžeta i ostalih bitnih odluka doprinijelo da se u 2017. godini na području Centra započnu i realizuju veliki projekti od kojih su najviše koristi imali građani i šira

## Najdraže odluke su one kojima poboljšavamo uvjete života

društvena zajednica. Mogu izraziti zadovoljstvo dosad urađenim, ali to ne znači da ne trebamo još više da se angažujemo i sinhronizirano sa izvršnom vlasti damo jedan novi vjetar u leđa razvojnim projektima koji su planirani u narednom periodu.

**Svjedoci smo da je održan veliki broj redovnih i tematskih sjednica na kojima su razmatrana mnoga pitanja i usvajane odluke od interesa za građane. Koje biste odluke posebno izdvojili kao doprinos rješavanju vitalnih problema stanovnika ove lokalne zajednice?**

Veoma je teško s obzirom na ograničen prostor pobrojati sve bitne odluke koje je Općinsko vijeće Centar usvojilo od svog konstituisanja. Naravno, odluke o usvajanju budžeta, koje se redovno usvajaju sa velikom podrškom, preduslov su za sve ostale odluke. Nesumnjivo i odluke kojima se realizuju kvalitetni projekti infrastrukturnog tipa su odluke koje jako utiču na kvalitet života građana lokalne zajednice, gdje bih izdvojila odluke vezane za realizaciju vodovoda Nahorevo, Nahorevska brda, Muharemoviće, odluke o sufinansiranju termo fasada, izgradnju zgrade za interno raseljene osobe. Ipak, meni najdraže odluke su one kojima poboljšavamo uvjete života naših najranjivijih kategorija, osoba treće životne dobi i djece među kojima izdvajam odluke o ustanovljavanju Dana penzionera, izgradnji škole na Šipu, obdaništa Razigrani dani, odluke o stipendiranju učenika i studenata i sl.

**Kako ocjenjujete saradnju sa parlamentarnim strankama koje participiraju u radu Općinskog vijeća.**

U Općinskom vijeću Centar Sarajevo djeluje sedam klubova vijećnika. Smatram da je veći broj političkih stranaka ili partija koje

participiraju u Općinskom vijeću Centar zapravo naša prednost, a ne otežavajuća okolnost. Svi politički subjekti koji djeluju u radu Vijeća daju svoj doprinos i naše sjednice su uvijek konstruktivne i produktivne. Različiti pogledi na određene situacije, odnosno odluke, sasvim su normalna, svakodnevna i na kraju za demokratska društva, uobičajena situacija tako da ponekad duže i burnije rasprave ne smijemo posmatrati nikako drugačije nego li pravo na suprotno mišljenje i slobodu iznošenja stavova. Na kraju kada podvučem crtu, saradnja sa parlamentarnim strankama je na zadovoljavajućem nivou, a svakako da je obaveza rukovodstva Općinskog vijeća da se odnosi i dalje unapređuju sve sa ciljem još produktivnijeg rada Vijeća.

**Kakva je saradnja rukovodstva Općinskog vijeća i izvršne vlasti Općine Centar na čelu sa načelnikom dr. Nedžadom Ajnadžićem?**

Saradnju predstavničke i izvršne vlasti Općine Centar također smatram jako kvalitetnom. Najbolji dokaz tome su projekti koji su realizovani ili koji su u fazi realizacije na terenu. Odnos općinske administracije, predvođene načelnikom Ajnadžićem, možda se najbolje vidi na sjednicama na kojima aktivno učestvuju, a sve sa ciljem da se nađe rješenje za određene probleme koji se pojave. Da su odnosi drugačiji, da nema sinhronizovanog djelovanja predstavničke i izvršne vlasti, zasigurno ne bi samo u prvoj godini od preuzimanja mandata imali preko 50 započetih ili u potpunosti realizovanih projekata. Vjerujem da će ovakav odnos donijeti jako dobre rezultate i u narednom periodu.

## O radu parlamentarnih stranaka govore predsjednici klubova vijećnika i vijećnici

Zamolili smo predsjednike klubova parlamentarnih stranaka zastupljenih u Općinskom vijeću Centar kao i samostalnih vijećnika da ukratko predstavite doprinos njihovih klubova vijećnika u radu i aktivnostima Općinskog vijeća Centar, zatim o projektima koji su bili i koji će biti u fokusu njihovog rada. Objavljujemo odgovore na sljedeća pitanja:

- Molimo da ukratko predstavite doprinos Vašeg kluba vijećnika u radu i aktivnostima Općinskog vijeća Centar od konstituisanja.
- Koji su projekti od interesa za stanovnike općine Centar bili u fokusu vaših aktivnosti?
- U vašim kontaktima sa građanima stižete uvid u potrebe i probleme na mjesnim područjima. Na rješavanju kojih zahtjeva ćete posebno insistirati u narednom periodu?

Igor Stojanović, predsjednik Kluba vijećnika Socijaldemokratske partije BiH



Centar. Kao Klub vijećnika

„Asim Ferhatović – Hase“. U našem fokusu su također socijalni projekti za lakši život penzionera, kao što su participacija iz budžeta za hljeb, mlijeko i prevoz za penzionere. Naša želja je da boračke organizacije što prije dobiju jedinstveno rukovodstvo. A ne kao do sada, gdje imamo 10 različitih organizacija. Kada je politički aspekt i ravnopravnost svih građana općine Centar u pitanju, nakon što je vladajuća većina izabrala rukovodstvo Vijeća u kojem su dva Bošnjaka, Hrvat i načelnik koji takođe dolazi iz reda Bošnjaka, pokrenuli smo proceduru izmjene Statuta Općine Centar koja bi se uskladila sa Ustavom Kantona Sarajevo i omogućila učešće u rukovodstvu predstavnicima srpskog naroda i iz reda ostalih.

• Klub vijećnika SDP-a učestvuje sa pet vijećnika u Općinskom vijeću Centar. U proteklih 18 mjeseci, vijećnici SDP-a su podnijeli skoro 100 inicijativa i pitanja prema općinskim službama koje su građani tražili od nas. Na neka pitanja i inicijative Općina još uvijek nije reagovala. Mi koristimo sva politička sredstva da ubrzamo reakciju i realizaciju Općinske izvršne vlasti u odnosu na naše inicijative i time unaprijedimo kvalitet života Općine Centar. Naša kancelarija Općinskog odbora SDP Centar u ulici Branislava Đurđeva 8 je otvorena za građane svaki radni dan od 8 do 16 sati gdje njihove prijedloge pretvaramo u inicijative na sjednicama Općinskog vijeća

smo konstruktivna opozicija i podržavamo prijedloge drugih vijećnika, iz koje god političke stranke dolazili, za koje smatramo da vode naprijed Općinu Centar prema evropskom standardu.

• Projekti za koje se zalaže Klub vijećnika SDP-a su prije svega izgradnja garaža na Marijindvoru u ulici Franca Lehara, zatim garaža na Ciglanama na Merhemića trgu, i garaža ispod zgrade FIS-a. Naš stav je da ove tri garaže mogu riješiti problem saobraćaja u mirovanju. Nezadovoljni smo zato što aktivnosti na ovim projektima idu sporo. Također se zalažemo za što skoriju rekonstrukciju stadiona

• Insistiramo da lift na Ciglanama što prije pređe u ruke Općine Centar. Čistoća na području Općine za nas je ozbiljan problem. Želimo da se u budžetu poveća stavka za tzv. utopljanje zgrada na području Centra. Nezadovoljni smo na koji način čišćenje ulica vrši JKP Rad, pa ćemo insistirati na općinskoj firmi koja bi obavljala svakodnevno čišćenje Općine. Također, projekt obnove vanjskih sportskih terena koji smo započeli prošle godine sa udruženjem „Jesi li za basket?“ se mora nastaviti. Želimo da ove godine zaživi projekt „Svjetla Sarajeva“, koji će u zimskom periodu obogatiti ponudu za provod i zabavu u našem gradu. O njemu će naši građani tek čuti.

## Abid Jusić, predsjednik Kluba vijećnika Stranke demokratske akcije



Klub vijećnika SDA je najveći klub u OV i preuzeo je najveću odgovornost za funkcionisanje

Vijeća. Stavovi kluba su uvijek konkretni i konstruktivni. Naš cilj je unapređenje rada Vijeća

i postizanje jedinstvenih rješenja u Općinskom vijeću.

Naši vijećnici su aktivni u radu Vijeća i komisijama. Projekti od posebnog interesa za naš klub su završetak osnovne škole na Šipu, završetak obdaništa „Razigrani dani“, popravak vodovodne i kanalizacione mreže, bolje uređenje parkova i zelenih javnih površina, rješavanje pitanja pasa lotalica i druga pitanja od interesa naših građana.

U narednom periodu insistiraćemo na završetku započetih projekata. Pored toga planiramo ostvariti nove kontakte sa građanima i raditi na rješavanju problema u njihovom interesu. Radićemo na većem otvaranju Općine za građane. To je obaveza i odgovornost svih vijećnika kojima su građani dali povjerenje koje se treba opravdati.

## Senada Bosno, predsjednica Kluba samostalnih vijećnika

• Klub samostalnih vijećnika čine Senada Bosno i Sejad Đozo i djeluje u tom svojstvu od 15. februara 2018. godine.

Opštedruštveni doprinos zajednici je obaveza svih, a posebno nas koji smo svakodnevno angažovani kao akteri političkih procesa. U proteklom periodu potencirali smo i imali kontinuirane neposredne kontakte s našim sugrađanima. S obzirom da smo ih u potpunosti shvatili te ušli u suštinu njihovih svakodnevni problema i potreba, predlagali smo i pokretali čitav niz pozitivnih procesa u našoj općini koji trebaju doprinijeti boljim i ugodnijim uvjetima života za sve njih, ali i nas, jer se uistinu smatramo njihovim „glasom“. Potpuno svjesni okruženja u kojem živimo, bazirali smo se na pokretanje inicijativa koje se najčešće odnose na realizaciju infrastrukturnih projekata.

• Naše inicijative su se odnosile na: poboljšanje uslova obrazovanja i boravka naše djece u osnovnim školama na području općine Centar, posebno OŠ „Alija Nametak“, rekonstrukciju kotlovnice, konusno uvlačenje ograde tj. izgradnju adekvatnog i sigurnog prilaza školi, instalaciju wi-fi infrastrukture radi implementacije pilot projekta elektronski dnevnik, prijevoz učenika od kuće do škole i obratno, izgradnju objekta osnovne škole u naselju Šip, izgradnju, sanaciju i rekonstrukciju vodovodne i kanalizacione



mreže, uređenje postojećih ali i izgradnju novih parkovskih površina i sportskih igrališta sa neophodnim mobilijarom, unapređenje i uvođenje redovnijeg gradskog prijevoza itd....

• Klub samostalnih vijećnika će i u narednom periodu kroz

svoje posvećeno djelovanje biti najbolji pokazatelj istinske spone između građana i nas - njihovih pravih predstavnika u Općini. U isto vrijeme, podržavat ćemo sve razvojne projekte bez obzira s koje strane dolaze i ko im je predlagatelj.

## Haris Mujanović, predsjednik Kluba Saveza za bolju budućnost BiH

- U našim programskim ciljevima smo kazali da ćemo graditi modernu, otvorenu i dinamičnu lokalnu zajednicu, odgovornu za održivi razvoj i prosperitetnu i sigurnu budućnost njenih građana; da ćemo graditi mjesto ugodnog življenja građana Centra. Klub je to i činio u ovom proteklom periodu: djelovanjem na sjednicama Općinskog vijeća, preko svojih članova u radnim tijelima OV, na kolegiju Vijeća te kroz dobru komunikaciju sa općinskom administracijom i načelnikom; argumentiranim pristupom, konstruktivnom raspravom i provodivim inicijativama.

U proteklom periodu Klub vijećnika SBB je podnio preko 70 inicijativa čiju realizaciju od strane općinske administracije građani mogu vidjeti na terenu.

Klub je otvarao konstruktivan dijalog i sa političkim subjektima koji tvore „opozicioni blok“ i imao je razumijevanje i za njihova i drugačija stajališta. Dijalog, spremnost na kompromis ali u okvirima zakonskih rješenja, Statuta Općine i Poslovnika o radu Općinskog vijeća, jesu svakako naše usmjerenje i opredjeljenje do sada ali i u budućem djelovanju. Nesumnjivo je da uspjeha ima, ima i problema, ali je bitno da smo ih svjesni. Prema tome, i uspjeh je zajedničko dostignuće i problemi su zajednički izazov. Ono na čemu će Klub ubuduće istrajavati i insistirati jeste dignitet Kolegija Općinskog vijeća u pripremi sjednica i dinamiziranju rada Vijeća, na mnogo kvalitetnijim pripremama i jačom odgovornošću rukovodstva Vijeća za tok i ishod sjednica i kvaliteta donesenih odluka i zaključaka.

- Klub SBB-a je projekte koje je



postavio načelnik sa općinskom administracijom, prihvatio kao svoje, jer su ti projekti kandidirani u izbornoj kampanji, dobili podršku, a načelnik je bio tadašnji zajednički kandidat na lokalnim izborima. Kao politički subjekt smo tada u kampanji dali naš stav po tim projektima, dali i neke naše ideje i prijedloge, koji su se našli među 118 projekta za lokalnu zajednicu. Dakle, to su i naši projekti, i uvjereni smo da su u interesu građana, jer već oko 50% tih projekata je vidljivo na terenu, po mjesnim zajednicama, po ulicama, dječjim igralištima, trgovima, vodovodu, kroz odnos prema osnovnom obrazovanju i školama, masovnom sportu za mlade, prema penzionerima... itd. Sve je to u funkciji zadovoljenja potreba građana. Svakako će i u narednom periodu biti prioritet projekti koji su od općeg interesa.

- Zahtjevi građana koji idu u pravcu ljepšeg, sigurnijeg i ugodnijeg života građana će biti sigurno u fokusu našeg interesa i našeg angažmana. To potvrđuju projekti koji se sada realiziraju i koji će biti realizirani u narednom periodu. To su projekti zaštite okoliša, popravke komunalne infrastrukture, energetske efikasnosti, lijepih ulica, projekti okrenuti mladim i njihovoj perspektivi. Klub SBB-a će naročito pratiti reformu lokalne samouprave i prilagođavanje općinske administracije tim zahtjevima i izazovima. Razvoj mjesne samouprave kroz jačanje uloge organa mjesne zajednice i jačanje građanskog aktivizma do boljih i kvalitetnijih zajedničkih rješenja od prostorno-planskih, preko infrastrukturnih, komunalnih, do kulturnih, sportskih, socijalnih i drugih pitanja jesu odrednice djelovanja Kluba.

## Sonja Akšamija, predsjednica Kluba Stranke penzionera/umirovljenika BiH



- Klub vijećnika Stranke penzionera/umirovljenika BiH u Općinskom vijeću Centar je od samog konstituisanja dobro saradivao, kako međusobno, tako i sa ostalim klubovima vijećnika i sa rukovodstvom Općinskog vijeća.

Redovno smo prisustvovali svim sjednicama Kolegija i aktivno učestvovali u njegovom radu.

- Obzirom na činjenicu da je Stranka penzionera/umirovljenika BiH, čiji smo mi izabrani predstavnici, prvenstveno usmjerena ka unapređenju užasno teškog položaja penzionera tako smo i mi iz Kluba SP/U u našem radu uglavnom bili fokusirani na sve projekte koji se tiču ove populacije koristeći svaku priliku da predlažemo i podržimo projekte koji će penzionerima i osobama treće životne dobi omogućiti kupovinu lijekova, hljeba i mlijeka, njegu, aktivan odmor u zatvorenom i u prirodi..., a posebno smo insistirali na izgradnji Doma penzionera na teritoriji naše općine. Međutim, naša aktivnost i interes nije usmjeren samo na penzione-

re nego i na sve građane čije smo pojedinačne i kolektivne komunalne probleme redovnim prezentiranjem nadležnim službama i našim vijećničkim pitanjima i inicijativama pokušavali riješiti. Također, mi nismo zaboravili ni mlade, pa smo tako predložili i reaktiviranje dječijeg vrtića u Mjesnoj zajednici Bardakčije.

- I dalje ćemo nastaviti aktivnu saradnju sa građanima na teritoriji cijele općine, i kroz razgovor s njima ćemo i identifikovati probleme za koje ne znamo unaprijed kakvi će biti. Ali ono što zasigurno znamo je da ćemo još više snage i vremena posvetiti osobama treće životne dobi, obilaziti ih i pokušavati riješiti njihove probleme. To namjeravamo raditi lično, ali i putem naših aktivista.

## Amra Zulfikarpašić, predsjednica Kluba Naše stranke

• Klub vijećnika Naše stranke je od početka konstituisanja Općinskog vijeća Centar kao najjači opozicioni klub insistirao da Vijeće radi sukladno Statutu Općine Centar i Poslovniku o radu OV Centar. Nažalost, od samog konstituisanja rada Vijeća, do priprema i održavanja sjednica, kršenje propisa je ustaljena praksa. Iako smo smatrali da su svi vijećnici izabrani da bi radili za dobrobit građana i da je svima u interesu da imamo funkcionalno Vijeće, to se nije dogodilo. Formalno preglasavanje sa jednim glasom više, uglavnom onako kako većinski blok u Vijeću želi, a ne kako je u interesu građana i Općine Centar, ustaljena je praksa. Tražimo donošenje Statuta Općine, odgovore na sva otvorena pitanja koja se zbog obaveze prema građanima moraju rješavati.

Vjerujemo da je došlo vrijeme da se da mogućnost građanima da putem kanala YouTube prate rad sjednica, da sjednice budu transparentne i da građani imaju uvid u rad ovih organa i vijećnika kojima su dali svoj glas.

• Naši projekti koji su bili u žiži aktivnosti u proteklom periodu su prije svega oni koji će zadovoljiti najšire potrebe građana Općine.

1. Brinemo o mladima kroz sufinansiranje kamate za kupovinu prve nekretnine, olakšicama na kreditni period.
2. Projekat "Centar za zdravo odrastanje" na prostoru bivše Austrijske kuće za sada je prioritet naših vijećnika.
3. Smatramo da je za naše građane važan i projekat utopljanja stambenih kolektivnih objekata kroz javni poziv koji se naslanja na naše zelene politike.
4. Podržavamo kulturni razvoj naše općine u nadi da će Sarajevo biti u skoroj budućnosti "Kulturna prijestolnica Evrope" kroz inicijativu za izgradnju kulturnih sadržaja, galerije, koncert hola i muzeja.
5. Brinemo za djecu prijedlozima za uređenje dječjih igrališta.



6. Led rasvjeta na cijelom području općine jedan je od naših ekoloških prioriteta jer štedi energiju a time i novac.

7. Radimo na projektima kojim su obuhvaćeni najugroženiji slojevi stanovništva. Insistiramo na donošenju savremenog i učinkovitog Statuta Općine Centar i osobitu pažnju želimo posvetiti odlukama, rješenjima, javnim nabavkama i transparentnom trošenju budžeta.

8. Tražimo odgovore na sva otvorena pitanja, koja se zbog obaveze prema građanima moraju rješavati.

• Svakodnevno smo sa našim sugrađanima, muče nas isti problemi: nedostatak kulturnih sadržaja koji bi činili glavnu općinu glavnog grada, loša infrastruktura, prljave javne površine, nedostatak mobilijara za djecu i mlade itd. Insistiramo već duže vrijeme na odgovornom

odnosu spram općinske imovine koja je na raspolaganju građanima i adekvatnom domaćinskom, redovnom održavanju iste. Smatramo da je mnogo ekonomičnije redovno održavanje uličnog mobilijara nego nova nabavka.

Uvijek ukazujemo i tražimo domaćinski odnos prema svoj imovini Općine Centar. Ne dozvoljavamo zloupotrebe, posebno kada je riječ o poslovnim prostorima i stanovima u vlasništvu naše Općine. Smatramo da novca ima dovoljno samo se neracionalno koristi, a često ne u interesu Općine i svih njenih stanovnika. Klub vijećnika Naše stranke će se svojim radom zalagati da Općina Centar bude, prije svega sigurno, čišće, ugodnije mjesto za život, svim našim komšijama, jer oni to zaista zaslužuju.

## Edin Abdurahmanović, vijećnik Demokratske fronte



Demokratska fronta je na lokalnim izborima 2016. godine usvojila ukupno 5 mandata. Četiri vijećnika su izašla iz Demokratske fronte čime je u Općinskom vijeću Centar ostao samo jedan vijećnik Edin Abdurahmanović.

Od prvog dana insistiramo na transparentnosti i poštivanju procedura rada Općinskog vijeća Centar. Za 22 sjednice, koliko ih je do danas održano, ukupno je upućeno 311 inicijativa i 93 vijećnička pitanja, a od toga, ispred Demokratske fronte su upućene 24 inicijative i 7 pitanja čime u ukupnoj statistici zauzimamo treće mjesto.

Projekti od posebnog interesa za Demokratsku frontu, a koje su kandidovali naši građani prema nama su prevoz djece sa poteškoćama u razvoju – naknada za parking mjesta, rješavanje parking mjesta, vraćanje nadležnosti prema lokalnoj zajednici, kružni tok na uglu Kranjčevićeve i Tešanjске ulice, saniranje Bolničke ulice, rješavanje smeća iz Ulice Pehlivanuša, asfaltiranje ulica, legalizacija, smanjenje, odnosno pojednostavljenje administracije unutar Općine - informatički segment, poticaji za privredne subjekte – zaposlenje...

Intervju: Salko Pašović, predsjednik Zdravstvenog savjeta Općine Centar



## Zabrinjava nas neadekvatna popunjenost porodičnih ambulanti

**Općinsko vijeće Centar je donijelo Odluku o osnivanju Zdravstvenog savjeta Općine Centar, što je obaveza propisana federalnim Zakonom o zdravstvenoj zaštiti i Zakonom o pravima, obavezama i odgovornostima pacijenata. Članove Zdravstvenog savjeta, čiji mandat traje četiri godine, imenuje općinski načelnik na osnovu javnog poziva.**

**Zdravstveni savjet Općine Centar konstituisan je 19. januara 2018. godine. Savjet ima devet članova i to: vijećnik Salko Pašović, predsjednik, Eldina Bešlijić, zamjenica predsjednika, Alma Kaljača, Bakir Nakaš, Mehmed Kulić, Ezrema Boškailo, Gjulera Dedović-Halilbegović, Dubravka Galić i Tea Dreković.**

**U ovom broju Informativnog biltena razgovaramo sa Salkom Pašovićem o aktivnostima Zdravstvenog savjeta Općine Centar.**

**Molimo da kažete koja je misija i uloga Zdravstvenog savjeta Općine Centar čiji ste predsjednik.**

Zadatak Zdravstvenog Savjeta je zakonom i pravilnikom definisan i on podrazumjeva:

- predlaganje i evaluiranje sprovođenja zdravstvene zaštite na području jedinice lokalne samouprave;
- Savjet daje mišljenje na planove i programe zdravstvene zaštite za područje lokalne samouprave, te predlaže mjere za poboljšanje dostupnosti i kvaliteta zdravstvene zaštite na svom području;
- prati primjenu propisa na području jedinice lokalne samouprave koji se odnose na zaštitu prava i interesa pacijenata, uposlenih i zdravstvenih radnika;
- organizuje obrazovne kurseve za građanstvo iz poznavanja materije o pravima pacijenata i postojeće legislative;
- daje preporuke za organizaciju kurseva u zdravstvenim ustanovama radi upoznavanja rukovodstva i

zdravstvenih radnika s konceptom prava pacijenata, legislativom i odgovarajućim nužnim promjenama u zdravstvenim ustanovama;

f) prati povrede pojedinačnih prava pacijenata na području jedinice lokalne samouprave;

g) predlaže preduzimanje mjera za zaštitu i unapređenje prava pacijenata i zdravstvenih radnika na području jedinice lokalne samouprave;

h) bez odgađanja obavještava zdravstveni savjet u kantonalnom ministarstvu o slučajevima težih povreda prava pacijenata koje mogu ugroziti život ili zdravlje pacijenata i zdravstvenih radnika;

i) podnosi Općinskom vijeću Centar i kantonalnom ministarstvu godišnju informaciju o svom radu;

j) obavještava javnost o povredama prava pacijenata i zdravstvenih radnika;

k) obavlja druge poslove određene zakonom.

Smatramo da je naša misija da sve što je predviđeno Zakonom u što boljoj mjeri bude provedeno u praksi.

**Zdravstveni savjet je od konstituisanja intenzivno radio. Donesen je Poslovnik i Plan rada za naredni period, razmatrana brojna pitanja i pokrenute inicijative. Jedna od njih je i inicijativa da se u što kraćem vremenskom periodu pokrene procedura za otvaranje ambulante porodične medicine na području mjesnih zajednica Pionirska dolina i Nahorevo.**

Inicijativa za otvaranje ambulante porodične medicine na području ovih mjesnih zajednica dolazi od samih građana i mi kao Savjet smo podržali i uputili inicijativu nadležnoj ustanovi na razmatranje. Međutim, ono što zabrinjava u sistemu zdravstvene zaštite je neadekvatna popunjenost ambulanti porodične medicine sa ljekarima, tako da smatramo da je najveći prioritet trenutno popunjavanje postojećih ambulanti timovima porodične medicine.

**Također ste uputili inicijativu za otvaranje punkta Hitne medicinske pomoći na području općine Centar, koji bi radio 24 sata, i predložili da to bude na lokaciji Jablaničke ulice pored Vatrogasne stanice gdje je punkt nekada i egzistirao.**

Inicijativa za otvaranje 24-satnog

punkta ima za cilj pružanje što boljeg hitnog medicinskog tretmana vitalno ugroženim pacijentima u što kraćem vremenskom periodu. U trenutnoj situaciji kada imamo saobraćajne gužve tokom većeg dijela dana, hitna medicinska pomoć nije u mogućnosti da u najadekvatnijem vremenskom periodu odgovori sa centralnog punkta u Pofalićima. Otvaranjem ovog punkta značajno bi se poboljšao tretman akutno oboljelih i teško povrijeđenih građana općina Centar i Stari Grad i eventualno turista koji u sve većem broju dolaze u naš grad. Nadamo se će nadležno Ministarstvo zdravstva Kantona Sarajevo i Zavod za hitnu medicinsku pomoć imati razumijevanja za ovu inicijativu.

**Jedna od lijepih inicijativa Zdravstvenog savjeta je i da se u povodu Dana Općine Centar, osim izbora Naj policajca, proglasi i nagradi Naj tim primarne zdravstvene zaštite.**

Ovom inicijativom nadamo se da ćemo na adekvatan način valorizovati sve one koji posvećeno i vrijedno rade svoj posao u zdravstvu. Nadamo se podršci načelnika Općine Centar ovoj inicijativi.

**U planu rada Savjeta je organiziranje kurseva i predavanja za građane. Kojim aktuelnim temama iz oblasti zdravstvene zaštite će biti posvećene ove edukacije?**

Što se tiče ovog segmenta rada Zdravstvenog savjeta mnogo je aktuelnih tema koje se mogu obraditi. Pomenut ćemo samo temu vakcinacije, promociju zdravog života, borbu protiv bolesti ovisnosti, osvješćivanje štetnosti pušenja, prevencija dijabetesa i kardiovaskularnih bolesti te promocija oralnog zdravlja. Također, Savjet će raditi i na poboljšanju zdravstvene zaštite osoba sa invaliditetom.

**Što biste još izdvojili iz programa rada Zdravstvenog savjeta za naredni period.**

Trenutno je Zdravstveni savjet najviše angažovan na pripremi za tematsku sjednicu Općinskog vijeća Izvještaja o zdravstvenom stanju stanovnika općine Centar. Na ovoj sjednici ćemo upoznati Općinsko vijeće o dosadašnjim aktivnostima i, nadamo se, dobiti preporuke za daljnje djelovanje.



# Eiffelov most mjesto susreta, prijateljstva, mladosti i „zaključanih ljubavi“

Načelnik Općine Centar dr. Nedžad Ajnadžić na Eiffelovom mostu na Skenderiji zaključao je katanac sa porukom ljubavi i mira u svijetu. Ovim činom je okončan kulturno-zabavni program organizovan na mostu povodom 14. februara - Dana zaljubljenih. Njegov primjer su slijedili i ostali prisutni, posebno mladi, koji su željeli „zaključati“ svoju ljubav i baciti ključ u Miljacku kako niko drugi ne bi mogao „otključati“ njihova srca.

- Šaljemo poruku svim građanima u BiH, ali i svijetu. Mi smo danas ustoličili novi dan, sarajevski ljubavni dan i bosansko-hercegovačku ljubavnu priču. Prije svega, sa ovog mjesta šaljemo dobre poruke. Očekujem da volite, prije svega, roditelje, komšije, svoj grad i državu. Mi želimo da sarajevska ljubav traje tokom 365 dana godišnje. Pozivam vas da ovaj most bude naše kulturno mjesto. Kao načelnik Općine Centar želim zaključati opredjeljenje da vodimo Općinu Centar, grad Sarajevo i Bosnu i Hercegovinu

u Evropsku uniju, naglasio je Ajnadžić.

O samoj ideji da se ovaj most iskoristi za „zaključavanje“ ljubavi, po uzoru na druge evropske metropole, govorila je Jasmina Fazlić, pomoćnica načelnika za obrazovanje, kulturu i sport Općine Centar.

-U prethodnom periodu je veliki broj građana „zaključavao“ svoju ljubav na ogradi Eiffelovog mosta i u tom kontekstu smo u Općini Centar došli na ideju da iskoristimo most kao simbol spajanja i ljubavi, te mladosti. Također će na ovom mostu za mlade bračne parove biti omogućeno vjenčanje. Općina Centar je finansirala postavku 3D elementa u obliku srca na kojem piše „With love Sarajevo – Općina Centar“, istakla je Fazlić. Kulturno-zabavni program povodom Dana zaljubljenih su organizovali predstavnici Centra kulture i mladih.



# Finansijska podrška Općine Centar uspješnim sportistima



osvojila naslov prvakinja Evrope u karateu na 45. evropskom prvenstvu za kadete, juniore i U-21 takmičare održanom u februaru ove godine u ruskom Sočiju. Njih dvoje je od Općine Centar dobilo iznos od po 500 KM. Ovom prilikom je također nagrađena i Amila Jusufbegović, članica teniskog kluba „Winner“ iz Sarajeva, državna prvakinja u tenisu u kategoriji juniorki do 16 godina, dok će Ajli Bašić, članici Atletskog kluba „Sarajevo“ i Atletske reprezentacije BIH u kategoriji mlađih juniorki, zaključak o dodjeli sredstava biti uručen naknadno. Za njih je iz budžeta Općine Centar izdvojen iznos od po 400 KM. Izvršna i zakonodavna vlast Općine Centar želi da u skladu sa raspoloživim mogućnostima nagradi uspjehe mladih sportista sa Centra koji na najbolji mogući način predstavljaju ovu općinu, grad Sarajevo i državu Bosnu i Hercegovinu.

Načelnik Općine Centar Sarajevo dr. Nedžad Ajnadžić i predsjedavajuća Općinskog vijeća Centar Karolina Karačić su u Domu mladih na Skenderiji za uspješne sportiste sa područja Centra uručili zaključke o dodjeli novčanih nagrada za njihove ostvarene izuzetne

sportske rezultate. Nagrađeni su profesionalni bokser Edin Puhalo, poznat u javnosti kao „Iron Puki“, aktuelni WBC prvak Mediterana, interkontinentalni prvak u WBF asocijaciji i UBF prvak Evrope, kao i Mirnesa Bektaš, članica Karate kluba Bosna koja je



## Nastavak pomoći Roditeljskoj kući za djecu oboljelu od raka

U prostorijama Roditeljske kuće za djecu oboljelu od raka, koja se nalazi na Jezeru, na Međunarodni dan djece oboljele od malignih bolesti, potpisan je protokol o realizaciji granta iz budžeta Općine Centar Udruženju „Srce za djecu koja boluju od raka u FBiH“.

U ime Općine Centar protokol je potpisao načelnik dr. Nedžad Ajnadžić, dok je u ime pomenutog udruženja, koje upravlja Roditeljskom kućom, protokol potpisao projekt menadžer Fikret Kubat.

Ovaj čin predstavlja nastavak višegodišnje finansijske podrške Općine Centar prema Roditeljskoj kući u kojoj su smješteni roditelji iz cijele Bosne i Hercegovine tokom liječenja njihove djece na Hematoonkološkom odjelu Pedijatrijske klinike Jezero u Sarajevu.

Pomenutim protokolom Općina Centar će iz svog ovogodišnjeg budžeta izdvojiti iznos od 10.000 KM kao finansijsku podršku radu Roditeljske kuće koja je smještena u krugu Pedijatrijske klinike Univerzitetskog kliničkog centra u Sarajevu.

-Svjesni smo činjenice da stanovnici općine Centar ne borave u Roditeljskoj kući, ali imamo moralnu i ljudsku obavezu da, koliko to naše mogućnosti dopuštaju, pružimo pomoć i podršku za rad Roditeljske kuće u njoj izuzetno humanoj misiji pomaganja oboljelim od malignih bolesti. Najbolje rješenje je da se finansiranje rada Roditeljske kuće stavi u institucionalne okvire, kazao je Ajnadžić prilikom potpisivanja protokola. Fikret Kubat je ovom prilikom kazao da je značajno što je na pomenuti međunarodni dan dobijena ovako značajna donacija Općine Centar, lokalne zajednice koja je sigurno najviše pomogla i izgradnju i funkcionisanje Roditeljske kuće. -Najviše smo zahvalni načelniku Ajnadžiću i Općinskom vijeću Centar na kontinuiranoj podršci i važno je istaći da u FBiH svake godine 60 djece oboli od raka, a ove godine pod sloganom „Zajedno možemo pobijediti rak“ šaljemo poruku da svi zajedno moramo pomoći ovoj djeci i da zajedno radimo na njihovom izlječenju. Na našem



Kliničkom centru do sada je izliječeno od malignih oboljenja više od 1.000 djece. U Roditeljskoj kući trenutno boravi osam porodica, a tokom posljednje dvije godine, otkako je otvorena Roditeljska kuća, bilo je smješteno više od 100 porodica iz cijele Federacije BiH. Roditelji i djeca koja borave kod nas nemaju samo spavanje i hranu nego i psihosocijalnu podršku, te imaju ono što je najvažnije a to je nada koju ova kuća daje, objasnio je Kubat.

Za rad Roditeljske kuće na godišnjem nivou je potrebno oko 120.000 KM.

## I u 2018. godini nastavak projekta „Hljeb i mlijeko za penzionere“

Općina Centar Sarajevo, predvođena načelnikom dr. Nedžadom Ajnadžićem i ove godine u okviru kontinuirane brige o najranjivijim kategorijama stanovništva realizira projekt „Hljeb i mlijeko za penzionere“ u okviru kojeg obezbjeđuje po 50 maraka mjesečno za oko 460 socijalno ugroženih starijih sugrađana kao participaciju za kupovinu osnovnih životnih namirnica – hljeba i mlijeka. U budžetu središnje sarajevske Općine u 2018. godini za ovu namjenu izdvojeno je 288.000 KM. Uslovi koje penzioneri moraju ispunjavati da bi ostvarili pravo na ovu pomoć je da imaju minimalnu penziju, odnosno da ukupna primanja domaćinstva ne prelaze iznos od 400 KM, što važi i za osobe preko 60 godina starosti. Podnosioci zahtjeva moraju biti prijavljeni najmanje dvije godine na području općine Centar, te jednočlano domaćinstvo u svom vlasništvu može imati najviše 50 kvadrata stana u objektima kolektivnog stanovanja, a u slučaju da žive u individualnim stambenim jedinicama, dozvoljena veličina stana je do 60 kvadratnih metara. Za svakog narednog člana domaćinstva dodaje se po 15 kvadrata korisne stambene površine. -U budžetu Općine za ovu namjenu izdvojeno je 288.000 maraka i to 250.000 maraka za socijalno ugrožene penzionere i 38.000 maraka za socijalno ugrožene osobe starije od 60 godina koje nisu ostvarile pravo na penziju. Na listi za januar trenutno imamo 404 penzionera sa minimalnim primanjima i 55 socijalno ugroženih osoba preko 60 godina koje nisu ostvarile pravo na penziju. Do sada je u ovoj godini za realizaciju ovog projekta utrošeno 22.950 KM. Projekt koji je pokrenut 2009. godine pokazao se kao pun pogodak, jer nam korisnici pomoći govore da 50 KM koje dobiju početkom svakog mjeseca od Općine Centar u okviru ovog projekta dobro dođe, posebno u situacijama kada isplate penzija kasne, kazala je Selma Čenanović, stručni saradnik iz oblasti socijalne zaštite u Službi za rad, zdravstvo i socijalna pitanja, izbjegla i raseljena lica Općine Centar.

## Prvi Centar za podršku porodicama sa djecom i osobama sa poteškoćama u razvoju



S obzirom da u Bosni i Hercegovini ne postoji sistemska podrška porodicama djece i osoba s poteškoćama u razvoju, te da je pomoć povremena i ograničena vremenski, Općina Centar kao društveno odgovorna lokalna zajednica krenula je u implementaciju projekta Centar za podršku porodicama sa djecom i osobama sa poteškoćama u razvoju.

Stim u vezi, u adaptiranim i prilagođenim prostorijama u Ulici Valtera Perića 3 upriličeno je potpisivanje Ugovora o partnerstvu s ciljem implementacije navedenog projekta čime je ozvaničen početak rada ovog Centra. Ugovor su potpisali načelnik Općine Centar dr. Nedžad Ajnadžić i predsjednica Udruženja za podršku porodicama sa djecom i osobama sa poteškoćama u razvoju „Colibri“ Aida Hrnjić. Pomenuto udruženje osnovali su roditelji sa područja općine Centar čija djeca imaju poteškoće u razvoju, a ujedno će biti implementator projekta.

Potpredsjednik Federacije Bosne i Hercegovine Milan Dunović prisustvovao je potpisivanju ugovora i pohvalio opredijeljenost Općine Centar da se uhvati u koštac sa problemima koji nisu riješeni na nivou države.

-Kada država zakaže, bez obzira na koji nivo vlasti mislimo, onda često imamo nevladin sektor koji priskoči u pomoć i popuni praznine koje država nije uspjela. Meni je zaista zadovoljstvo da je Udruženje „Colibri“ pokrenulo inicijativu u dijelu u kojem je država zakazala, a kada su u pitanju najranjivije kategorije društva, naša djeca. Posebno je zadovoljstvo što je Općina Centar prepoznala značaj i dala maksimalnu finansijsku podršku ovom projektu, kazao je Dunović.

Predsjedavajuća Skupštine Kantona Sarajevo Ana Babić istakla je važnost brige o djeci sa poteškoćama u razvoju.

-Važan trenutak je kada prepoznamo potrebe djece sa poteškoćama u razvoju. Moramo posvetiti pažnju toj

djeci jer oni je zaista trebaju. Ovo je divan primjer da pokažemo svima da možemo, želimo i hoćemo da sudjelujemo u dobrim i humanim projektima, dodala je Babić.

Predsjedavajuća Općinskog vijeća Karolina Karačić naglasila je da je Općinsko vijeće Centar dalo punu podršku realizaciji ovog projekta.

-U ime Općinskog vijeća i svoje lično ime želim izraziti zadovoljstvo zbog početka rada ovog izuzetno značajnog Centra. Snaga jednog društva se ogleda u tome koliko je sposobno da se skrbi i brine o svojim najranjivijim građanima. Mislim da je Općina Centar pokazala svoju odgovornost i svoju snagu realizacijom ovog projekta. Dužni smo brinuti o djeci sa poteškoćama u razvoju i pomoći njihovim roditeljima koji svakodnevno vode bitku za svoju djecu, kazala je Karačić.

Hrnjić se zahvalila načelniku Ajnadžiću, službama Općine Centar i Općinskom vijeću što su od samog početka imali





razumijevanja za jedan ovakav projekat.

-Ovaj Centar je prijeka potreba za našu djecu. Cilj cijelog projekta je da olakša funkcionisanje i porodice, a prvenstveno da pomogne djeci sa poteškoćama u razvoju. Ovo je prvi projekat u Kantonu Sarajevo ovakvog tipa, ali i mnogo šire, naglasila je Hrnjić.

Načelnik Ajnadžić je podsjetio prisutne da je Općina Centar jedna od rijetkih lokalnih zajednica koja brigu o osobama sa invaliditetom i djeci sa poteškoćama u razvoju godinama unazad stavlja u fokus svojih aktivnosti.

-Puno je dobrih projekata na koje možemo biti ponosni, ali ovo danas spada u jedan od prioriternih projekata koji je ponos i zasluga i općinske administracije i Općinskog vijeća. Danas su glavni junaci naša djeca koja imaju potrebu za ovakvim Centrom i njima moramo biti posvećeni. Želimo djeci sa poteškoćama u razvoju i njihovim porodicama poboljšati kvalitet života kako bi aktivno sudjelovali u društvenim aktivnostima i bili ravnopravni članovi društva. Želimo biti primjer koji će pokrenuti odlučnost svih nivoa vlasti da se uključe u ovu aktivnost i da zajedno učinimo sve da naša djeca imaju dobru budućnost. Udruženje „Colibri“ osnovano je od strane roditelja čija djeca imaju poteškoće u razvoju, a ko bi drugi bolje od njih štitio interese ove djece, zaključio je Ajnadžić.

## Besplatne użine za 487 ućenika



U okviru kontinuirane brige za djecu iz porodica slabijeg imovinskog stanja Općina Centar Sarajevo i ove školske godine finansira nabavku đačkih użina.

Kao i prethodnih godina, osim ućenika 11 osnovnih škola sa podrućja ove lokalne zajednice, besplatne đačke użine imaju i djeca iz Centra za slušnu i govornu rehabilitaciju djece i Centra za odgoj, obrazovanje i rehabilitaciju "Vladimir Nazor". Za tu namjenu u općinskom budžetu za 2018. godinu izdvojeno je 85.000 maraka.

Službi za rad, socijalna pitanja, zdravstvo, izbjegla i raseljena lica Općine Centar škole dostavljaju spiskove sa imenima ućenika koji se nalaze u stanju socijalne potrebe, odnosno koji ostvaruju pravo na dodatak na djecu koji je i jedan od uvjeta za ostvarivanje prava na besplatnu użinu, na osnovu čega pomenuta služba provjerava stanje na terenu i donosi odluku o ispunjavanju prava na ovaj vid pomoći. Za jedno dijete mjesečno se izdvaja po 16 KM za użinu i to devet mjeseci u godini, s obzirom na to da se nabavka użina ne vrši za vrijeme raspusta.

# Više od pola miliona maraka za kulturu

Iako nema nadležnosti u oblasti kulture Općina Centar Sarajevo svake godine izdvaja sve više sredstava iz svog budžeta za razvoj i promoviranje aktivnosti u ovoj važnoj društvenoj djelatnosti, a posebno za što veće i sadržajnije učešće mladih u kulturnim zbivanjima.

Da se trend ulaganja u kulturu nastavlja i jačim intenzitetom dokazuje i činjenica da je u budžetu Općine Centar za 2018. godinu planirano više od pola miliona konvertibilnih maraka za tu namjenu. Sredstva su raspoređena za različite svrhe, od podrške radu institucijama kulture i pojedinim značajnim kulturnim manifestacijama, pa sve do finansiranja konkretnih projekata prvenstveno namijenjenih mladima sa područja središnje sarajevske općine.

Tako će u ovoj godini Javna ustanova Centar kulture i mladih Općine Centar, čiji je osnivač središnja sarajevska Općina, dobiti 245.000 maraka za rad i realizaciju brojnih projekata koji doprinose razvoju kulture na području središnje sarajevske općine i šire. Najveći broj projekata namijenjen je mladima koji, zahvaljujući finansijskoj podršci Općine Centar, imaju priliku besplatno pohađati brojne sekcije, odnosno škole gdje se upoznaju o osnovama slikarstva, književnog stvaralaštva, pjevanja, plesa, sviranja klavira, gitare, teatarske umjetnosti, s ciljem podsticanja i razvijanja talenata i što većeg učešća mladih u kreiranju kulturnog života u vlastitoj sredini. Tu su i besplatne teatarske predstave za učenike osnovnih škola na sceni Centra kulture i mladih u Jelićevoj 1 kao i obnovljenim prostorijama FIS-a gdje je otvoreno sjedište ove javne ustanove, a svake, pa i ove godine se izdvaja i dodatnih osam hiljada KM za kupovinu karata osnovcima za predstave u sarajevskom Narodnom pozorištu primjerene njihovom uzrastu.

Više od 100.000 konvertibilnih maraka Općina će izdvojiti za podršku ustanovama kulture, te manifestacijama i festivalima koji afirmišu naš grad i Bosnu i Hercegovinu.

Sarajevo Film Festival, najveći filmski festival u jugoistočnoj Evropi, koji se održava od 1994. i svake godine privlači oko



100.000 posjetilaca, bit će i iz ovogodišnjeg općinskog budžeta podržan sa 40 hiljada maraka.

Kad je riječ o ustanovama kulture i nauke, za Akademiju nauka i umjetnosti bit će izdvojeno 10 hiljada maraka, a za Muzej Alije Izetbegovića 5.000 KM. Za podršku projektima iz oblasti kulture od značaja za općinu Centar koji se realiziraju u KJP Centar Skenderija u budžetu je obezbijeđeno 20 hiljada maraka, a za poboljšanje prostornih uslova rada i opremljenosti ustanova iz oblasti kulture 30 hiljada maraka.

Izdavanje knjiga u cilju afirmiranja novih književnih ostvarenja Općina će i ove godine pomoći sa 15 hiljada maraka, a izradu monografije općine Centar sa 20 hiljada konvertibilnih maraka.

Osim podrške razvoju kulture na području ove lokalne zajednice Općina Centar će nastaviti sa finansijskom potporom institucijama kulture od općeg značaja i interesa za Bosnu i Hercegovinu, a koje se nalaze na području Centra.

## Škola poduzetništva Općine Centar

Općina Centar je već više godina zaredom, u saradnji sa Udruženjem „Idea“, realizirala Školu poduzetništva kroz koju godišnje prođe 50-60 kandidata. Projekt je namijenjen edukaciji mladih, žena, nezaposlenih osoba i drugih ugroženih kategorija o mogućnostima pokretanja i uspješnog vođenja vlastitog biznisa. Osnovna ideja je ohrabrivanje polaznika i unapređenje njihovih znanja, u smislu razvoja poduzetničkog duha i ideja, u cilju aktivnog uključenja u društveni život i unapređenja kvaliteta života, kako pojedinca, tako i zajednice u cjelini.

Škola poduzetništva je intenzivni trodnevni trening o pokretanju i uspješnom vođenju sopstvenog biznisa, a posebno je korisna za sve mlade ljude koji namjeravaju aplicirati za općinske poticaje u osnivanju start-up biznisa. Osim predstavljanja teorijskih koncepata i prezentacije praktičnih savremenih znanja, edukacija sadržava i primjere iz prakse, individualne i grupne diskusije i zadatke, te praktičnu primjenu stečenih znanja u formi kreiranja poslovnog plana.

U 2017. godini školu poduzetništva pohađalo je 63 učesnika, kojima je po okončanju seminara načelnik Općine



# Besplatna edukacija i posao za buduće programere

Osim dodjele bespovratnih sredstava mladima za pokretanje vlastitog biznisa Općina Centar provodi i druge mjere kojima potiče zapošljavanje. Tako je prošle godine pokrenula projekt besplatne edukacije mladih fakultetski obrazovanih nezaposlenih osoba za IT programere kako bi što prije dobili posao.

U januaru ove godine potpisan je ugovor između firme ATIA d.o.o. realizatora nastave u edukacionom programu IT obuke za programere za 34 polaznika. Cilj je osposobiti nezaposlene mlade osobe sa fakultetskom diplomom za poslove iz oblasti primjene informacionih tehnologija, s obzirom na to da je IT sektor deficitaran u našoj državi, a potražnja za stručnjacima iz ove oblasti ogromna. Firma ATIA d.o.o. se također obavezala da će zaposliti najmanje 85% polaznika koji uspješno završe obuku.

Raspisan je 12. juna 2017. i produžen do 20. augusta javni poziv mladima za učešće u programu obuke za programere koju finansira Općina. Kandidati za učešće u ovom programu treba da su stanovnici općine Centar najmanje tri godine, da su prijavljeni na Birou za zapošljavanje najmanje godinu dana i da imaju završeno fakultetsko obrazovanje, izuzev završenih fakulteta informatičke struke.

Svi prijavljeni kandidati koji ispunjavaju kriterije utvrđene Pravilnikom o kriterijima i načinu dodjele stipendija za nezaposlene osobe u cilju prekvalifikacije i edukacije u oblasti primjene informacionih tehnologija pristupili su testiranju koje je obavila edukacijska ustanova. Nakon rezultata testiranja izvršeno je rangiranje i izbor kandidata sa kojima je Općina sklopila ugovor o finansiranju troškova prekvalifikacije i edukacije.

Obuka je počela sredinom januara i trajat će šest mjeseci. Načelnik Ajnadžić, koji je inicijator i pokretač ovog projekta poželio je mladima uspješnu edukaciju.

-Mislim da je ovo izuzetno važan dan za sve vas, ali i za Općinu Centar kao progresivnu lokalnu zajednicu. Za

realizaciju ovog projekta Općina Centar je obezbijedila 150.000 KM, a sve u cilju da pomogne mladim ljudima da lakše dođu do zaposlenja. Hvala vam što ste prihvatili ovaj ne tako lagan izazov. Želim vam da apsorbuje što više znanja i da postanete konkurentni na tržištu rada. Planiramo nastaviti sa ovim projektom, a iz budžeta ćemo povećati izdvajanja za ovu namjenu, istakao je Ajnadžić.

Jedan od polaznika obuke je Almir Ustamujić, diplomirani ekonomista.

-Kada sam vidio konkurs odlučio sam se prijaviti s obzirom da je veliki broj diplomiranih ekonomista na evidenciji nezaposlenih u službi za zapošljavanje. Diplomirao sam ekonomiju 2009. godine, imao neka privremena zaposlenja, a na birou za zapošljavanje sam četiri godine. Danas je teško doći do stalnog zaposlenja, a mislim da je ova prekvalifikacija odlična prilika mladim ljudima da riješe svoj radni status, zaključio je Ustamujić.



Centar dr. Nedžad Ajnadžić uručio certifikate o završenoj obuci i naglasio da je edukovana omladina nosilac promjena koje su prijeko potrebne našoj privredi i ekonomiji na putu ka zemljama Evropske unije.

-Općina Centar ulaže velike novce i daje vam priliku da pokrenete svoj biznis i kroz rad obezbijedite egzistenciju. Sa ovim certifikatom omogućeno vam je dobijanje nepovratnih finansijskih sredstava za start-up biznis. Ova sredstva će biti data mladim ljudima koji su napravili dobar projekat i kroz ovu vrstu finansiranja ćemo obezbijediti nova radna mjesta, objasnio je Ajnadžić.

# Općina pomaže mladima



Općina Centar od 2015. godine provodi program kroz koji potiče samozapošljavanje mladih kao strateški plan poboljšanja i ostvarivanja poslovnog ambijenta u kojem će mlade nezaposlene osobe moći svojim radom uspjeti osigurati egzistenciju te ostvariti profesionalnu karijeru. U 2015. godini za tu namjenu iz općinskog budžeta izdvojeno je 50.000 KM, a s obzirom na veliko interesovanje mladih i pozitivna iskustva, sa projektom se nastavilo i naredne godine kada je izdvojeno 100.000 KM, zatim u 2017. godini 236.250 KM, dok je ove godine obezbijedeno oko 200.000 KM za pokretanje 10 do 15 start up biznisa. Na ovaj način, dodjeljujući bespovratna budžetska sredstva mladima za njihove poslovne projekte, Općina im otvara puteve kojima mogu zakoračiti u poslovni svijet, osigurati vlastitu egzistenciju i poboljšati standard življenja.

Podsjećamo da je, na prijedlog Komisije za mlade, Općinsko vijeće Centar na 35. redovnoj sjednici održanoj 23. jula 2015. godine usvojilo Odluku o poticaju zapošljavanja mladih iz sredstava budžeta Općine Centar. Cilj donošenja ove odluke je dati poticaj poduzetništvu i samozapošljavanju nezaposlenih mladih osoba starosti do 35 godina sa područja općine Centar i to kroz sufinansiranje troškova pokretanja i razvoja vlastitog biznisa. Dodjela bespovratnih finansijskih sredstava budućim mladim poduzetnicima u skladu je sa usvojenom Strategijom prema mladima općine Centar i Akcionim planom. Odlukom je definisano ko mogu biti korisnici ovih sredstava, osnovni kriteriji za izbor poslovnih projekata kao što su samoodrživost, inovativnost i drugo, zatim postupak dodjele, visina bespovratnih sredstava, monitoring i drugo.

Na osnovu pomenute odluke, Općina Centar svake godine raspisuje javni poziv za finansiranje i sufinansiranje najboljih poslovnih projekata sredstvima općinskog budžeta namijenjenim razvoju poduzetništva i zapošljavanju mladih. Pravo na bespovratna sredstva

iz budžeta Općine Centar za pokretanje i razvoj vlastitog biznisa, koja mogu iznositi do 15.000 KM po poslovnom planu, imaju stanovnici općine Centar do 35 godina starosti koji se nalaze na evidenciji nezaposlenih Zavoda za zapošljavanje Kantona Sarajevo. U zadanom roku potrebno je da mladi aplikanti dostave poslovni plan vlastitog biznisa. Ocjenu poslovnih planova koje mladi predstave i postupak dodjele bespovratnih sredstava shodno utvrđenim kriterijima vrši Komisija za provođenje postupka dodjele sredstava za poticaj zapošljavanja mladih Općine Centar, koju imenuje općinski načelnik.

Zahvaljujući programu samozapošljavanja koji provodi Općina Centar, 33 mladih sa područja ove lokalne zajednice uspješno vode vlastiti biznis čime su obezbijedili svoju egzistenciju. Njima su u proteklom periodu dodijeljena bespovratna finansijska sredstva za pokretanje vlastitog biznisa u pojedinačnim iznosima od 8.000 do 15.000 KM za najbolje biznis planove. Tako su ovi mladi ljudi otvorili radionice za izradu novog i restauraciju starog namještaja, odjevnih predmeta, unikatnog nakita, abažura i lampi, radionicu za restauraciju, popravku i digitalizaciju starih ili oštećenih spisa i knjiga, bravarske usluge. Pojedini su otvorili turističke agencije, automehaničarsku i autolakirersku radnju, radionicu za proizvodnju autokozmetike, produženi boravak za djecu, fizioterapeutske, frizerske i kozmetičarske salone, arhitektonski projektantski biro, centre za edukaciju, agenciju za prevođenje, agenciju za usluge čišćenja poslovnih prostora i stanova...

Općina Centar je ovim putem mladima koji ne žele čekati šansu za posao u javnom ili privatnom sektoru, pružila priliku da pokažu svoju kreativnost, sposobnost i volju za radom na poljima koja oni smatraju interesantnim. Među mladima koji su dobili sredstva je i mlada arhitektica Adna Ahmedić za projekt „concept storea“ ili „concept dućana“ koji nije samo izložbeni i prodajni prostor nego u modernom dobu mijenja i

# a da pokrenu vlastiti biznis



nadopunjuje svrhu standardnih galerija i drugih izložbenih prostora.

Još jedan od mladih ljudi koji su, zahvaljujući Općini Centar, uspjeli započeti vlastiti biznis je i Haris Ibrulj koji je otvorio vlastitu radionicu za restauraciju, popravku i digitalizaciju starih ili oštećenih spisa i knjiga, gdje obnavlja malo ali vrijedno arhivsko blago triju institucija: Vrhbosanske nadbiskupije, Medžlisa Islamske zajednice i Orijentalnog instituta u Sarajevu.

Maji Jačević, magistrici pedagogije dodijeljena su sredstva iz općinskog budžeta zahvaljujući kojima je sa velikim entuzijazmom otvorila produženi boravak za djecu „Happy Days“. -Trenutno opstajemo od svog rada, kazala je Jačević dodavši da ona i njene pomoćnice kroz kreativne radionice, čitanje, igru, učenje, pisanje domaćih zadaća, a ponekad i pripremanje rođendanskih proslava, produktivno i zabavno provode vrijeme sa djecom koja borave u njihovom produženom boravku.

Igor Ostović je grafički dizajner koji se ranije bavio restauracijom starog namještaja pa je odlučio svoju egzistenciju pronaći u toj oblasti. Optimistično je krenuo pripremati projekat, te ga je u konačnici, zahvaljujući Općini Centar, uspio i realizirati. Sada ima svoju radionicu u kojoj obnavlja stari namještaj, a ponekad izrađuje i novi.

-Jednostavno morate raditi, rekao je Igor, te dodao da su mu klijenti pretežno osobe starije dobi koje iz sentimentalnih razloga ne žele baciti određeni komad namještaja nego se odlučuju za njegovu restauraciju.

Po okončanju srednjoškolskog obrazovanja Nedžad Bećar je odlučno krenuo u istraživanje poslovnih djelatnosti najmanje zastupljenih u Bosni i Hercegovini. -Tada sam vidio da je proizvodnja auto-mirisa i uopće svih proizvoda koji se odnose na auto kozmetiku, jako malo zastupljena kod nas, te

biznisa. - Uz pomoć ovog programa, koji je bio prekretnica u mom životu, otvorio sam firmu. Od dobijenih sredstava nabavio sam mašine i aparate koji su mi potrebni za rad, kazao je Nasuf koji je od oca učio varilački zanat i vremenom postajao sve uspješniji. Stoga je odlučio ozbiljnije se baviti tim poslom i otvoriti firmu, što je učinio zahvaljujući poticaju Općine. Posla i zadovoljnih klijenata ima.

Diplomirani fizioterapeut Salko Hadžimusić je prilikom otvaranja svog salona za fizioterapiju kazaoda je pokrenuo ovaj biznis zahvaljujući



da se svi proizvodi ovakve vrste uvoze iz drugih zemalja. Stoga sam odlučio napraviti biznis plan koji će omogućiti domaću proizvodnju i zasad je dobro krenulo. Auto mirisi koje mi proizvodimo se prave i od drveta i od papira. Pravimo i mirise za ormare i nudimo ih ovdašnjim buticima. Također pravimo i podmetače za čaše, ističe Nedžad kome biznis trenutno ide dobro, a ostvario je jako kvalitetne poslovne kontakte te namjerava proširiti proizvodnju i svoje proizvode ponuditi i vanjskom tržištu.

Mladi Nasuf Krupalija, koji je za ovaj program Općine Centar čuo posredstvom prijatelja, u potpunosti je uspio realizovati svoj projekat i sada radi na razvoju sopstvenog

sredstvima koje je izdvojila Općina Centar.

-Odobrena sredstva Općine Centar sam iskoristio za opremanje i početak rada salona za fizioterapiju. U salonu nudimo kompletnu fizioterapiju, liječenje dodirom, odnosno pokretom, što podrazumijeva kompletnu fizikalnu terapiju, vježbe, korektivnu gimnastiku, vježbe za kukove i istezanje, manuelnu terapiju ramena i ramenog pojasa, vrata, te posebni program vježbi za osobe koje imaju problema sa vrtoglavicama, objasnio je Hadžimusić. Privatna praksa za fizioterapiju „Fizio-Fit“ za sada ima jednog uposlenog, ali sa razvojem posla salon će povećavati broj uposlenih.

# Dodijeljeno 14 plastenika

U cilju podrške zapošljavanju, posebno boračke i izbjegličke populacije Općina Centar, predvođena načelnikom dr. Nedžadom Ajnadžićem, obezbijedila je u ovogodišnjem budžetu 20.000 KM za nabavku plastenika, površine 50 kvadratnih metara, sa dodatnom opremom koji su dodijeljeni poljoprivrednicima, pripadnicima boračke i izbjegličke populacije koji imaju prebivalište na području središnje sarajevske općine.

Načelnik Ajnadžić je kazao da ovaj projekat svake godine okuplja sve više zainteresovanih ljudi za ovu vrstu proizvodnje.

-Općina Centar je posljednje tri godine podijelila 70 plastenika koji zauzimaju površinu od 3.500 metara kvadratnih i u narednom periodu imamo namjeru podijeliti isti broj plastenika. Ovaj projekat je u vrhu prioriteta za administraciju Općine Centar i dobro je prihvaćen među stanovnicima koji imaju priliku baviti se poljoprivrednom proizvodnjom. Svi mi želimo da imamo školovanu i akademski uvaženu djecu, ali isto tako moramo ih naučiti da rade na polju i da nije sramota danas uzeti krampu, motiku ili lopatu u ruke. Također želim reći da rebalansom općinskog budžeta u aprilu ove godine planiramo obezbijediti dodatna sredstva za nabavku još plastenika koje ćemo podijeliti ove godine. Ukoliko budete zainteresovani za plasman svojih proizvoda Općina Centar je spremna finansirati zakup stola na jednoj od tržnica u ovoj općini, a vaše je da donesete i prodajete ono što ste proizveli u svojim plastenicima, objasnio je Ajnadžić.

Predsjedavajuća Vijeća Karolina

Karačić je čestitala prisutnima na njihovom radu i zalaganju u unapređenju poljoprivredne proizvodnje u Centru.

- Nadam se da će uz ovu podršku Općine Centar vaš rad biti još bolji i da će vaši proizvodi upotpuniti ponudu organskih i zdravih proizvoda, kao i da ćete svoj kućni budžet poboljšati i Općinsko vijeće Centar će nastaviti podržavati ovakve projekte, kazala je Karačić.

Podsjećamo, na javni poziv za predaju zahtjeva za dodjelu plastenika, koji je bio objavljen 12. februara 2018. godine i bio otvoren 15 dana, zaprimljena su 44 zahtjeva koja su uputili stanovnici rubnih područja općine Centar. Kako je bilo navedeno u javnom pozivu pravo na dodjelu plastenika imali su svi zainteresovani stanovnici općine Centar koji posjeduju, odnosno koji su zakonski korisnici poljoprivrednog zemljišta na području ove općine, pogodnog za plasteničku proizvodnju. Poljoprivrednici su se prilikom potpisivanja ugovora zahvalili Općini Centar i načelniku Ajnadžiću na ovoj vrijednoj donaciji koja će zasigurno povećati prinose i prihode u njihovim domaćinstvima.

-Dodjela plastenika za mene i moju šesteročlanu porodicu znači mnogo i stoga želim da se zahvalim svima koji su pomogli u ovom projektu. Sada ćemo sigurno imati bolje prinose koji će itekako sačuvati naš kućni budžet, kazao je Edhem Murto koji stanuje u Ulici Kromolj 88 i bavi se poljoprivrednom proizvodnjom od 2002. godine.

## Kontinuirana briga za boračku populaciju

Imajući i vidu težak ekonomsko socijalni položaj boraca i njihovih porodica i nedovoljnu brigu društva za njihove brojne probleme i potrebe, Općina Centar Sarajevo u okviru kontinuirane brige o boračkoj populaciji, najzaslužnijoj za današnju slobodnu i nezavisnu BiH, dugi niz godina redovno iz svog budžeta izdvaja značajna sredstva kako bi im pružila potporu i razne vrste pomoći. Tako je u općinskom budžetu za 2018. godinu za tu namjenu obezbijedeno gotovo 600 hiljada konvertibilnih maraka. Pri tome za finansiranje projekata i programa boračkih udruženja izdvojeno je 300 hiljada maraka, a ta sredstva se raspoređuju putem Komisije Općinskog vijeća za boračka pitanja i to na osnovu javnog poziva.

Za jednokratne novčane pomoći ratnim vojnim invalidima, porodicama šehida i poginulih boraca i demobilisanim borcima planirano je 105 hiljada konvertibilnih maraka, s ciljem ublažavanja posljedica teškog ekonomsko socijalnog položaja pripadnika boračke populacije kojima je neophodna socijalna, zdravstvena i druge vrste pomoći. Raspodjela i ovih finansijskih sredstva se vrši putem Komisije za boračka pitanja, a prema usvojenim kriterijima. Dodatnih 20 hiljada maraka će biti utrošeno za jednokratne novčane pomoći borcima i njihovim porodicama povodom značajnijih datuma, kao što je Dan Općine Centar i Odreda "Souk-bunar", 105. motorizovane brigade, vjerskih i državnih praznika.

I ove godine je u budžetu obezbijedeno 70 hiljada maraka za kontinuirani projekt Općine kojim se osiguravaju dodatna mjesečna primanja za ratne vojne invalide, korisnike prava na tuđu njegu i pomoć, a u skladu sa utvrđenim kriterijima Službe za boračko-invalidsku zaštitu. Uz to, planirano je i 15.000 KM kao finansijska podrška za ugradnju ručnih komandi u putničkim automobilima koje Vlada Federacije BiH dodjeljuje ratnim vojnim invalidima sa 100% invaliditetom. Za aktivnosti i organizaciju manifestacija obilježavanja datuma i godišnjica od značaja za Općinu Centar, kao i za održavanje spomen-obilježja na području središnje gradske općine u budžetu je obezbijedeno 48 hiljada konvertibilnih maraka. Osim toga, za izgradnju jedinstvenog spomen-obilježja "Ljiljan" planirano je 25 hiljada, a 10 hiljada maraka za pomoć Fondu memorijala Kantona Sarajevo za izgradnju i očuvanje mezarja šehida i globalja poginulih boraca, memorijalnih centara i spomen-obilježja žrtvama genocida.



# Općoj bolnici donirana sredstva za kupovinu opreme

U prostorijama Općine Centar potpisan je protokol kojim je iz budžeta ove lokalne zajednice donirano 20 hiljada maraka Općoj bolnici prim.dr. Abdulah Nakaš. Protokol su potpisali, u ime Općine Centar, načelnik dr. Nedžad Ajnadžić, a u ime Opće bolnice direktor Zlatko Kravić.

Donirana sredstva će biti iskorištena za kupovinu aparata za bodiplotizmografiju. Pomoću tjelesnog plotizmografa, pored standardnih plućnih parametara, može se izmjeriti otpor u disajnim putevima, provodljivost disajnih puteva, kao i ukupan volumen pluća i grudnog koša. Aparat automatski prikazuje rezultate ispitivanja, te je na taj način moguće otkriti i najmanje promjene na plućima, kao i identifikovati mjesta i uzroke slabe funkcije.

Prema riječima načelnika Ajnadžića, donacija je nastavak kontinuirane saradnje Opće bolnice i Općine Centar.

-Svake godine Općina izdvoji sredstva za ono što je najpotrebnije ovoj bolnici, a sve sa ciljem poboljšanja usluga za pacijente. Ova donacija je samo dio



sredstava koja smo planirali u ovoj godini za vaše potrebe. Nastavit ćemo pomagati Opću bolnicu i u budućnosti, naglasio je Ajnadžić.

Sredstva koja je Općina Centar donirala Općoj bolnici, prema riječima direktora Kravića, podići će kvalitet zdravstvene usluge.

-Općina Centar pomaže našu ustanovu u kontinuitetu i na tome smo jako zahvalni. Mnogo opreme smo nabavili tokom proteklih godina zahvaljujući podršci ove lokalne

zajednice. Smatramo da je potrebno, osim nabavke savremene opreme i aparata, ulagati i u specijalizaciju i obuku medicinskih kadrova, a nadamo se da će Općina imati sluha za naše potrebe, naglasio je Kravić.

Posljednja donacija Općine Centar samo je jedna u nizu koje je ova lokalna zajednica predvođena načelnikom Ajnadžićem realizovala u posljednjih nekoliko godina, a sve sa ciljem da se pacijentima pruži kvalitetnija medicinska usluga.

## Kvalitetnija zdravstvena usluga

Načelnik Općine Centar dr. Nedžad Ajnadžić i generalni direktor Javne ustanove „Dom zdravlja Kantona Sarajevo“ Fuad Husić potpisali su protokol o realizaciji granta u iznosu 35.000 KM koji je iz budžeta pomenute Općine izdvojen ovoj medicinskoj ustanovi. Donirani novac će biti iskorišten za nabavku stomatološke stolice u stomatološkom odjelu Zavoda za hitnu medicinsku pomoć Kantona Sarajevo.

-Zdravstvo nije u direktnoj nadležnosti Općine Centar, ali s obzirom na činjenicu da je dobro zdravstvo uz školstvo jedan od najbitnijih segmenata modernog društva, koliko nam dozvoljavaju naše finansijske mogućnosti, redovno izdvajamo sredstva za unapređenje uslova u ova dva segmenta. Također imamo namjeru da u skorije vrijeme nabavimo jedno vozilo za medicinsku pomoć koje ćemo ustupiti na korištenje Javnoj ustanovi „Dom zdravlja KS“ za transport do nepokretnih i starih pacijenata i njihovo zbrinjavanje, posebno u rubnim područjima općine Centar, objasnio je Ajnadžić.

Uputivši riječi zahvalnosti načelniku Ajnadžiću i Općinskom vijeću Centar za ovu i sve dosadašnje donacije, direktor Husić je naglasio da će zahvaljujući današnjoj donaciji biti zamijenjena zastarjela oprema stomatološkog odjela Zavoda za hitnu medicinsku pomoć.

– Sa ovim sredstvima, osim stomatološke stolice, također ćemo moći nabaviti i potrebnu opremu za ordinaciju za pružanje hitnih usluga iz oblasti stomatologije, a oprema će koristiti, ne samo stanovnicima općine Centar, nego iz

cijelog Kantona Sarajevo koji dolaze na pregled u ovu medicinsku ustanovu, kazao je Husić.

Načelnik Ajnadžić i generalni direktor Husić su također razgovarali o unapređenju dugogodišnje uspješne saradnje između Općine Centar i JU „Dom zdravlja KS“. Bilo je govora i o otvaranju dvije ambulante porodične medicine na Nahorevu i Bolničkoj ulici.

-U programu rada naše javne ustanove za ovu godinu smo planirali otvaranje ambulante porodične medicine za potrebe stanovništva područja Pionirske doline i Nahoreva. Također je u planu otvaranje zamjenske ambulante umjesto nekadašnje na Višnjiku. U Bolničkoj ulici u toku je izgradnja novog stambeno-poslovnog objekta u kojem će biti smještena ova zamjenska ambulanta kao i dio Centra za fizikalnu terapiju koji je sada smješten u Vrazovoj ulici. Također smo sa načelnikom Ajnadžićem razgovarali da centralni objekat iz Vrazove ulice uključimo u projekat povećanja energetske efikasnosti čime ćemo osim znatnih ušteda energije i smanjenja troškova napraviti bolje uslove za liječenje naših pacijenata i rad medicinskog osoblja, pojasnio je Husić.

Potpisivanju protokola također je bio prisutan i vijećnik Općinskog vijeća Centar Haris Mujanović, koji je uputio inicijativu za izdvajanje finansijskih sredstava iz budžeta Općine Centar za potrebe opremanja stomatološke ordinacije u Zavodu za hitnu medicinsku pomoć KS.

# Ekološka akcija okupila veliki broj učesnika

U povodu Dan planete Zemlje, te Dana Općine Centar koji se obilježavaju 22. aprila, odnosno od 2. do 9. maja, na području centralne gradske općine u petak, 20. aprila 2018. godine, provedena je velika ekološka akcija čišćenja i ozelenjavanja javnih površina, na kojoj je učestvovao veliki broj ljubitelja prirode.

Organizator ove akcije je Služba civilne zaštite, a učestvovali su osim predstavnika Općine Centar i Komisije Općinskog vijeća za ekologiju i zaštitu kulturnog i prirodnog naslijeđa i studenti i profesori Šumarskog fakulteta u Sarajevu, članovi štabova civilne zaštite mjesnih zajednica, učenici osnovnih i srednjih škola, radnici KJKP "Park", te zainteresirani građani.

-Danas smo zasadili 62 sadnice visokog rastinja od čega je 51 sadnica zasađena u gradskom parku Jezero na Betaniji dok je u parku u Ulici Dajanli Ibrahim-bega ispod Romskog naselja na Gorici također zasađeno 11 novih sadnica. Tokom današnje akcije zasađene su sadnice, te živica na prostoru Arboretuma na Kromolju, gdje je održan i ekološki čas za učenike



osnovnih škola. Danas smo poduzeli aktivnosti i na čišćenju zelenih površina na nekoliko lokacija u Centru, objasnila je Anira Dedović, viši stručni saradnik za poslove planiranja iz Službe za prostorno uređenje i komunalne poslove Općine Centar.

Dok je na pomenutim lokacijama trajala sadnja stabala jasena, bagrema, breze, smrče..., učenici Zubotehničke škole su očistili zelene površine oko stadiona „Asim Ferhatović Hase“ na Koševu i porodilišta na Jezeru. Učenici su angažovani u okviru projekta "Ekskurzija 2018", gdje im je Općina Centar obezbijedila 2.000 KM, a oni su za taj iznos očistili ove lokacije.

Jedna od učesnica današnje eko akcije Općine Centar je i Nermina Mešić, koja se uvijek rado odazove na svaku akciju čišćenja i uređenja okoliša.

–Ponosna sam što sam danas

ovdje i svojim primjerom želim da motiviram omladinu da uzme učešće u ovakvim akcijama koje imaju za cilj uređenje našeg okoliša, čime bismo doprinijeli uljepšavanju naše okoline koju nažalost zagađuju neodgovorni pojedinci. Mišljenja sam da čuvanjem i zaštitom naše okoline ostavljamo budućim generacijama ljepšu planetu i našu životnu sredinu. Ovom akcijom želimo također poslati poruku mladima da nije ponižavajuće što čistimo okolinu i da trebamo da uživamo u čistoj i lijepo uređenoj prirodi, kazala je Mešić.

Mjesni štabovi civilne zaštite su zajedno sa građanima očistili zelene površine oko prostorija svih mjesnih zajednica, dok su također očišćene i uređene zelene površine na lokalitetu starog rezervoara na Soukbunaru i oko džamije na Šipu.



## TELEFONI U OPĆINI CENTAR

Centrala	562 300
Informacije	562 379
Kabinet općinskog načelnika	562 310
Kabinet Općinskog vijeća	562 311

Izdavač OPĆINA | OPŠTINA CENTAR SARAJEVO

Glavni i odgovorni urednik **Safet Huremović**

Telefon 033 562 304 • WEB [www.centar.ba](http://www.centar.ba) • E-mail [press@centar.ba](mailto:press@centar.ba)

Priprema tekstova Kabinet Općinskog načelnika • Adresa Ulica Mis Irbina 1, 71000 Sarajevo • Faks 033 562-400

• Centrala 033 562-300 • Zamjenik urednika **Đina Crnković** 033 562-431 • DTP Služba za informatiku 562-330

• Saradnici **Salih Horozović** i **Envera Pandžić**, 033 562-325 • Štamparija Blitdruk Sarajevo • Tiraž 4. 000 primjeraka